

प्रकासित वाक्य

इ किताबे क बारे में यूहन्ना कहेस

1 इ ईसू मसीह क प्रकासित वाक्य अहइ जउन ओका परमेस्सर स इ बरे मिला अहइ जइसे कि जउन बात होइवाली अहइ, ओनका अपने सेवकन क दिखावा जाइ। आपन दूत भेजके मसीह अपने सेवक यूहन्ना क इसारा कइके बताएस। 2 यूहन्ना जउन कछू देखे रहा, ओकरे बावत बताएस। इ उ सच्चाई अहइ जेका ईसू मसीह बताए रहा। इ उ संदेस अहइ जउन परमेस्सर क अहइ। 3 उ मनई धन्य अहइ जउन परमेस्सर क भविस्सबाणी क नीक संदेस क पड़त ह, अउर सुनत ह अउर उ पचे धन्य अहई जउन बातन एहमाँ लिखी अहई, जे ओनकइ पालन करत ह। काहेकि परिपूर्ण क समइ नजदीक अहइ।

कलीसियन क नाउँ यूहन्ना क संदेस

4 यूहन्ना कइँती स एसिया प्रान्त* में बरकरार सात कलीसियन क नाउँ उ परमेस्सर कइँती स जउन अहइ, जउन हमेसा स रहा अउर जउन आवइवाला अहइ, ओन सात आतिमा कइँती स जउन ओकरे सिंहासन क सामने अहई। 5 अउर उ ईसू मसीह कइँती स जउन बिसवास भरा साच्छी, मरा मनइयन में पहिला जी उठइ वाला अउर धरती क राजन क राजा अहइ तोहका कृपा अउर सान्ति मिलइ।

उ जउन हमसे पिरेम करत ह अउर जउन आपन खून स हमका पचे क आपन पापन स छुटकारा देवाएस। 6 उ हमका एक राज्ज अउर अपने परमपिता परमेस्सर क सेवा में याजक होइ क बनाएस। ओकर महिमा अउर पराक्रम हमेसा बरकरार रहइ! आमीन!

7 देखा, बादलन क साथ मसीह आवत अहइ। हर एक आँखी ओकर दर्सन करी। एहमाँ ओनकइ सामिल अहई जउन ओका मारे रहेन।* धरती क सब मनई ओकरे कारण रोइही! हाँ! सचमुच अइसा होइ! आमीन! 8 सबसे बड़ी ताकतवाला पभू परमेस्सर, जउन बरकरार अहइ, हमेसा हमेसा स रहा अउर जउन आवइवाला अहइ, कहत अहइ, “मई अलफा (आदि) अउर ओमेगा (अन्त) दुइनउँ अही।”

9 मई, यूहन्ना अउर ईसू में तोहार भाई अहई! हम संग संग ईसू में अही अउर ईसू क कारण अत्याचार, राज्ज अउर धीरज में भरी सहनशीलता में तोहार साच्छी अही। परमेस्सर क बचन अउर ईसू क साच्छी देइ क कारण मई पतमुस* नाउँ क द्वीप में रहेउँ। 10 पभू क दिन मई आतिमा क वसीभूत हो उठेउँ अउर मई अपने पाछे तुरही क एक

तेज आवाज सुनेउँ। 11 उ कहत रही, “जउन कछू तू देखइ अहा, ओका एक किताब में लिख द्या अउर फिन ओका इफिसुस, स्मुस्ना, पिरगमुन, थूआतीरा, सरदीस, फिलादेलफिया अउर लौदीकिया क सातउ कलीसियन क भेज द्या।”

12 फिन इ देखइ क बारे कि इ आवाज केकर बाटइ जउन मोसे बोलत रही, मई मुड़ेउँ अउर जब मई मुड़ेउँ तउ मई सोने क सात दीपाधार देखेउँ। 13 अउर ओन दीपाधारन क बीच मई एक आदमी क देखेउँ जउन “मनई क पूत” क जइसा कउनउँ मनई रहा। उ अपने गोड़े तक लम्बा चोगा पहने रहा। अउर ओकरी छाती प एक सुनहरी पटका लिपटा रहा। 14 ओकर मूँड अउर बाल सफेद ऊन क तरह उज्जर रहेन। ओकर आँखिन आगी क चमचमात लपट क तरह रहिन। 15 ओकर पैर भट्टी में अबहीं अबहीं तपावा गवा कांसा क नाई दमकत रहेन। ओकर आवाज तमाम पानी क धारा क गरज क तरह रही। 16 अउर उ अपने दाहिने हाथे में सात तारा धरे रहा। ओकरे मुँह स एक तेज दुधारी तलवार बाहर निकरत रही। ओकर तस्वीर तेज दमकत सूरज क तरह उज्जर रही।

17 मई जब ओका देखेउँ तउ मई ओकरे पैर प अइसेन गिर पड़ेउँ जइसेन मरा मनई गिरइ। फिन उ आपन दाहिना हाथ मोरे ऊपर रखेस अउर कहेस, “डैराय न जा, मई पहिला अहउँ अउर मई आखिरी अहउँ। 18 मई उहइ अहउँ जउन जिअत अहउँ। मई मरि ग रहेउँ मुला देखा, अब मई हमेसा हमेसा बरे जिन्दा अहउँ। मोरे पास मृत्यु अउर अधोलोक क चाभी अहइ। 19 तू जउन कछू देखे अहा, जउन कछू होत अहइ, अउर कछू आगे होइवाला अहइ ओका लिखत जा। 20 इ जउन सात तारा अहई जेनका तू मोरे हाथे में देखत अहा अउर जउन इ सात दीपाधार अहई एनकइ सबन क गुप्त रहस्य अहइ: इ सात तारा सात कलीसियन क सरगदूतन अही अउर इ सात दीपाधार सात कलीसियन अही।

इफिसुस की कलीसिया क मसीह क संदेस

2 “इफिसुस क कलीसिया क सरगदूत क इ लिखा: “उ जउन अपने दाहिने हाथे में सात तारन क धारन करत ह अउर जउन सात दीपाधारन क बीच घूमत ह, इ तरह कहत अहइ 2 मई जानत अहउँ जउन तू करत अहा अउर, कड़ी मेहनत अउर धीरज भरी सहनशीलता क जानित हउँ अउर मई इहइ जानित हउँ कि तू बुरा मनइयन क राह नाहीं पउत्या अउर तू ओनका परखे अहा जउन कहत अहई

एसिया प्रान्त एसिया माइनर क एक प्रान्त।

मारे रहेन लखई यूहन्ना 19:34

पतमुस एजिअन समुदर में एसिया माइनर क तट क निअरे एक ठु छोटा सा द्वीप जउन आजुकल टर्की कहा जात ह।

कि उ पचे प्रेरितन बाटेन मुला सही में नाहीं अहई। तू ओनका झूठा पाए अहा। 3मई जानित हउँ कि तोहरे में धीरज अहइ अउर मोरे नाउँ प तू कठिनाई झेले अहा। अउर तू थका नाहीं अहा।

4“मुला मोरे लगे तोहरे विरोध में इ अहइ: तू पिरेम छोड़ दिहे अहा जउन सुरुआत में तोहरे में रहा। 5 इ बरे याद करा कि तू कहाँ स गिर अहा, आपन मनफिराव अउर उ करा जेका तू सुरुआत में करत रह्या, जदि तू पछतावा न करब्या तउ मई तोहरे लगे आउब अउर तोहरे दीपाधार क ओकरी जगह स हटाइ देब। 6मुला इ बात तोहरे हित में अहइ कि तू नीकुलइयन* क काम स नफरत करत अहा, जेनसे मई भी नफरत करत हउँ।

7जेकरे लगे कान अहई, उ ओका सुनई जउन आतिमा कलीसियन स कहत अहइ। जे विजय पाई मई उही परमेस्सर क बगिया में लगा जीवन क पेड़ स फल खाइ क अधिकार देब।

स्मरना की कलीसिया क मसीह क संदेस

8स्मरना क कलीसिया क सरगदूत क इ लिखा: “उ जउन पहिला अहइ अउर जउन आखिरी अहइ जउन मर ग रहा अउर फिन स जी उठा। 9उ कहेस मई तोहरे साथ जउन अत्याचार भवा ओका अउर तोहरी दीनता दुइनउँ क जानत हउँ वइसे तू धनवान अहा। जउन खुद क यहूदी कहत अहा, अउर जउन तोहार निन्दा करे अहइ, मई ओका भी जानत हउँ। यद्यपि ओन्हन सही सही यहूदी न अही। बल्कि उ पचे सइतान क आराधनालय अहई जउन सइतान स संबंध रखित ह। 10उ अत्याचार स तोहका डेराय क जरूरत नाहीं अहइ, जउने क तोहका सहइ क अहइ। सुना, सइतान तोहरे में स कछू जने क बंदीगृह में इइके तोहार परीच्छा लेइ जात अहइ। अउर तोहका हुवाँ दस दिन तक कस्ट भोगइ क अहइ। चाहे तोहका मर जाइ क पड़इ मुला सच्चा बना रह्या तबइ तोहका जीवन वाला मुकुट देब।

11जउन सुन सकत ह, सुन लेइ कि आतिमा कलीसियन स का करत अहइ। जउन जीत जाई ओका दूसरी मउत स कउनउँ नुकसान न उठावइ क पड़ी।

पिरगमुन की कलीसिया क मसीह क संदेस

12“पिरगमुन क कलीसिया क सरगदूतन क इ लिखा:

“उ जउन तेज दोधारी तलवार क धरत अहइ उ इ तरह स कहत ह: 13मई जानत हउँ कि तू कहाँ रहत बाट्या जहाँ सइतान क सिंहासन बाटइ। अउर मई इहउ जानत हउँ कि तू मोरे नाउँ प स्थिर अहा, अउर तू मोरे बरे आपन बिसवास क कबहुँ जकारया नाहीं। तोहरे उ नगर में जहाँ सइतान क निवास अहइ, मेरा बिसवासपूर्ण साच्छी अन्तिपास मार दीन्ह गवा रहा।

14“मुला मई तेरे विरोध में कछू कहइ चाहत हउँ: तोहरे हिआँ कछू अइसे लोग बाटेन जउन बिलाम क सिच्छा क

मानत ही। उ बालाक क सिखावत रहा कि इस्त्राएलियन क मूर्तियन क चड़ावा खाइ अउर व्यभिचार करइ क प्रोत्साहित करइ। 15अइसे तोहरे हिआँ भी कछू अइसे मनइयन अहई जउन नीकुलइयन क सीख प चलत अहई। 16एह बरे मनफिरावा नाहीं तउ मई जल्दी ही तोहरे पास आउब अउर ओनके बिरोध में उस तलवार स युद्ध करबइ जउन मोरे मुँह स निकरत बाटइ।

17“जउन सुन सकत ह, सुन लेइ कि आतिमा कलीसियन स का कहत अहइ।”

“जउन बिजयी होई मई हर एक क गुप्त मन्ना देब। मई ओका एक सफेद पाथर देब जेह पइ एक नवा नाउँ लिखा होई। जेका ओकरे अलावा अउर कउनउँ नाहीं जानत अहइ, जेका उ दीन्ह गवा बाटइ।

थूआतीरा क कलीसिया क मसीह क संदेस

18“थूआतीरा क कलीसिया क सरगदूतन क नाउँ इ लिखा:

“परमेस्सर क पूत, जेकर आँखिन धधकती आग क समान बाटिन, अउर जेकर पैर चमकते काँसा क जइसे अहई, इ कहत अहइ: 19मई तोहरे कारज, पिरेम, बिसवास, सेवा अउर धैर्य क जानत हउँ। मई इहउँ जानत हउँ कि तोहार वर्तमान कारज विगत कारज स अधिक होत बाटइ। 20मुला मई तेरे विरोध में कछू कहइ चाहत हउँ: तू उ स्त्री इजेबेल क अपने मध्य रहइ देता अहा, जउन अपने आपको नबीया कहत ह। मुला मोरे सेवकन क व्यभिचार करइ अउर मूर्तियन क आगे चड़ाई भइ चीजन क खाइ बरे सिच्छा देत अहइ। 21मई ओका मनफिरावा क अवसर दिहे अहउँ। मुला उ अपने व्यभिचार स मनफिरावा नाहीं चाहत। 22अउर मई ओका रोग चारपाई प डाउब। अउर जे ओकरे साथ व्यभिचार करत अहई तउ उ तरह क कस्ट अउर दिक्कत भोगई जब तलक अपने काम क पछतावा न कइलेई। 23मई महामारी फैलाइके ओकरे लरिकन क मारि डाउबब अउर सब कलीसियन क पता चल जाइ कि मई उहइ अहउँ जउन सब मनइयन क मन अउर बुद्धि क जानत अहइ। मई तोहका सबका तोहरे काम क हिसाब स फल देबइ।

24“अब मोका थूआतीरा क बाकी बचे क कछू मनइयन स कछू कहइ क अहइ कि जे इस सीख प नाहीं चलतेन अउर जउन सइतान क अउर ओकरे छिपी बातन क नाहीं जानत अहई। मई तोहरे ऊपर अउर कउनो बोझा नाहीं डावा चाहत अहउँ। 25मुला जउन कछू तोहरे लगे अहइ, ओह प मोरे आवइ तक चलत रहा।

26“जउन मनई जीत हासिल करी अउर जउन बातन क मई आदेस दिहे अहउँ आखिरी दम तक मोर आदेस पर टिका रही, जेहका मई चाहत अहउँ ओका मई राष्ट्रन पर अधिकार देत हउँ।

27तथा उ ओनके ऊपर लोहे क इण्डे स सासन करी। उ ओनका माटी क भाँड़न क तरह चूर चूर कइ देई।’

नीकुलइयन एसिया माइनर क धरम गुट। इ झूठ बिसवास अउर बिचार क मनवइया रहा। एकर नाउँ क धरब कउनो नीकुलइयन क नाउँ क मनई प कीन्ह ग होइ।

28इ उहइ अधिकार अहइ जेका मई अपने परमपिता स पाए अहउँ। मई अइसे मनई क भोर क तारा देब। 29जेकरे पास कान अहई, उ सुन लेई कि आतिमा कलीसियन स का कहत अहइ।

सरदीस की कलीसिया क मसीह क संदेस

3“सरदीस कलीसिया क सरगदूत क इ तरह लिखा: “अइसा उ कहत ह जेकरे लगे परमेस्सर क सात आतिमा अउर सात तारा अहई मई तोहरे काम क जानत अहउँ सब मनइयन क कहब अहइ कि तू जितत अहा, मुला तू तउ मर ग अहा। 2सावधान रहा! अउर जउन कछू बचा अहइ, ओका विलाइ जाइ क पहले अउर मजबूत बनावा काहे बरे कि अपने परमेस्सर क निगाह में मई तोहरे काम क नीक नाहीं पाए अहउँ। 3इ बरे जउने उपदेस क तू सुने अहा अउर पाए अहा, ओका याद करा। उही प चला अउर आपन मनफिरावा। जदि तू न जगब्या तउ चोर क तरह मई चला आउब। एकै तोहका पता नाहीं होइ कि मई कब अउबउँ अउर तोहका अचम्भा में ड़ाइ देब। 4जउनउ कछू होइ, मुला सरदीस में तोहरे लगे कछू अइसे मनइयन अहई जउन अपने क खराब नाहीं किहे अहई। उ पचे नीक मनई अही, इ बरे मोरे साथ उज्जर उज्जर कपरा पहिनी क घूमिहई। 5जउन उ जीती, उ इही तरह उज्जर कपरा पहिनी मई जीवन क पुस्तक स ओकइ नाउँ न हटाउबइ, मई ओकरे नाउँ क परमपिता अउर सरगदूतन क सामने मानता देबइ। 6जेकरे लगे कान अहई, उ पचे सुन लेई कि आतिमा कलीसियन स का कहत अहइ।

फिलादेलफिया कलीसिया क मसीह क संदेस

7“फिलादेलफिया कलीसिया क सरगदूत क इ तरह लिखा:

“उ जउन पवित्तर अउर सच्चाई अहइ अउर जेकरे लगे दाऊद क चाभी अहइ जउन अइसा दरवाजा खोलत ह, जेका केहू खोल नाहीं पावत, इ तरह कहत ह; 8मई तोहरे काम क जानित ह। देखा तोहरे सामने मई एक दरवाजा खोल दिहे अहउँ, जेका केहू बन्द नाहीं कइ सकत। मई जानत हउँ कि तोहार ताकत कम अहइ मुला तू मोर उपदेस क पालन किहे अहा, अउर मोर नाउँ क खंडन नाहीं किहे अहा। 9सुना! कछू अइसे अहई जे सइतान क आराधनालय अही अउर जउन यहूदी न होत भए अपुना क यहूदी कहत ही, जे एकदम झूठा अहई, ओनका मई मजबूर कइके तोहरे पैर में झुकाइ देब जइसे कि ओनका पता चल जाइ कि तू मोका अच्छा लागत ह्या। 10तू धीरज क साथ सहनशीलता स मोर आदेस क पालन किहे अहा। एकरे बदले में मई इम्तिहान क घड़ी में तोहार रच्छा करबइ, जउन कि धरती पर रहइवालेन क परखइ क बरे पूरे संसार में आवइवाली अहइ।”

11“मई बहुत जल्दी आवत अहउँ। जउन कछू तोहरे पास अहइ, ओकरे ऊपर डटा रहा जइसे कि तोहार जीत क मुकुट कउनउँ लेइ न पावइ। 12जउन मनई जीती, ओका मई अपने परमेस्सर क मंदिर क खम्भा बनउबइ। फिन उ कबहू

मंदिर क बाहर न जाई। अउर मई अपने परमेस्सर क अउर अपने परमेस्सर क नई नगरी क नवा यरूसलेम नाउँ ओकरे ऊपर लिखबइ, उ नगरी परमेस्सर कइँती स सरग स नीचे उतरइवाली अहइ। ओकरे ऊपर मई अपनउँ नये नाउँ लिखबइ। 13जे सुन सकत ह सुन लेइ कि आतिमा कलीसियन स का कहत अहइ।

लौदीकिया की कलीसिया क मसीह क संदेस

14“लौदीकिया क कलीसिया क सरगदूत क इ लिखा:

“जउन आमीन* अहइ बिसवास भरा अहइ, सच्ची साच्छी अहइ, जउन परमेस्सर क रचना क एक ठु सासक अहइ, इ तरह कहत ह: 15मई तोहरे काम क जानत हउँ अउर इहउ कि न तउ इ ठंडा होत ह अउर न गरम। मई चाहत हउँ कि तू या तो ठंडा रहा या गरम। 16इ बरे कि तू गुनगुना अहा, न तउ गरम अहा न ठंडा, एहि कारण मई तोहका अपने मुँह स उगलइ जात अहउँ। 17तू कहत अहा कि मई धनी होइ गवा हउँ अउर मई भाग्यसाली होइ गवा अहउँ अउर मोका कउनउँ चीज क जरूरत नाहीं अहइ, मुला तोहका पता नाहीं अहइ कि तू अभाग्या अहा, दयनीय अहा, आँधर अहा अउर नंगा अहा। 18मई तोहका इ सलाह देत अहउँ कि तू मोका आगी में तपावा सोना खरीदा जइसे कि तू सही सही धनवान होइ जा। पहिनइ क वास्ते सफेद कपरा लइ ल्या जइसे कि तोहरी बेसामी अउर नंगाई क तमासा न खड़ा होइ जाइ। अपने आँखन में लगावइ क वास्ते तू आँजन लइ ल्या जइसे कि तू निहार सका।

19“ओनका सबेन्ह क जेनका मई पिरेम करित हउँ, मई ड़ाटत अहउँ अउर अनुसासित करत हउँ। कठिन जतन कइके आपन मनफिराइ ल्या। 20सुना, मई दरवाजे प खड़ा अहउँ अउर खटखटावत अहउँ। जउ केहू मोर आवाज सुनत ह अउर दरवाजा खोल देत ह तउ मई अन्दर आइ जइहउँ अउर ओकरे साथे बइठके खाना खाबइ। अउर उ मोर साथे बइठके खाना खात ह।

21“जउन मनई जीती मई ओका अपने साथे सिंहासन प बइठइ देब। जइसे कि जीत हासिल कइके मई अपने पिता क साथे सिंहासन प बइठा अहउँ। 22जे मनई सुनि सकत ह सुन लेइ, कि आतिमा कलीसियन स का कहत अहइ।”

सरग क दर्शन

4 एकरे बाद मई आपन निगाह उठाएँ तउ उहाँ सरग क खुला दरवाजा मोरे सामने रहा। अउर उहइ आवाज जउने क मई पहले सुने रहेउँ, तुरही क आवाज जइसी मैं मोसे कहत रही, “हिआँ ऊपर आइ जा। मई तोहका उ देखाउब जउन आगे चलिके होइवाला अहइ।” 2फिन तुरन्तइ मई आतिमा क बस मैं होइ गएउँ। मई देखेउँ कि मोर सामने सरग मैं सिंहासन अहइ अउर ओकरे ऊपर केउ बइठा अहइ। 3जउन ओह प बइठा रहा ओकै चमक यसब अउर गोमेद क तरह रही। सिंहासन क चारिहुँ कइँती एक

आमीन आमीन सबद क अरथ अहइ उ परम सत्य क तरह होइ जाब। मुला हिआँ एँका ईसू क नाउँ क रूप मैं बइपरा ग अहइ।

मेघधनुस रहा जउन पन्ना क तरह दमकत रहा। 4उ सिंहासन क चारिहुँ कइँती चौबीस सिंहासन अउर रहेन। ओकरे ऊपर चौबीस बुजुर्गन* बइठा रहेन। उ पचे सफेद कपरा पहिने रहेन। ओनके मूड़े प सोने क मुकुट रहेन। 5सिंहासन भरा बिजली क चकाचौध, घड़घड़ाहट, अउर बादर गरजइ क आवाज आवत रही। सिंहासन क समन्वा लपलपात सात मसाल जरत रहिन। इ मसाल परमेस्सर क सात आतिमा अहइँ। 6सिंहासन क समन्वा पारदर्सी कांच क स्फटिक समुद्दर जइसा फइला रहा।

सिंहासन क ठीक समन्वा अउर ओकरे दुइनुँ तरफ चार जीवित प्राणी रहेन। ओनके आगे अउर पाछे आंखिन रहिन। 7पहला जीवित प्राणी सेर क तरह रहा, दूसर जीवित प्राणी बइल जइसा रहा, तीसरे जीवित प्राणी क मुँह मनई जइसा रहा। अउर चौथा प्राणी उड़ते हए गरुड़ क समान रहा। 8इ चारू ही प्राणीयन क छः छः ठू पखना रहेन। ओकरे चारो तरफ अउर भीतर आंख आंख भरी पड़ी रहिन। दिन रात उ पचे हमेसा कहत रहेन:

“पवित्तर, पवित्तर, पवित्तर पर्भू परमेस्सर सर्वसक्तिमान, उहइ रहा, उहइ अहइ, अउर उहइ आवत अहइ।”

9जउ उ जिअत प्राणी उ सदैव रहत क महिमा, आदर अउर धन्यवाद करत रहेन, जउन सिंहासन प बइठा रहा, तउ ब उ 10चौबीसौ बुजुर्गन ओकरे पैरन में गिरके हमेसा जिअत रहइवाले क आराधना करत ही। उ सिंहासन क समन्वा आपन मुकुट डाय देत ही अउर कहत ही:

11“हे हमार पर्भू अउर परमेस्सर! तू महिमा, समादर अउर ताकत पावइ क बरे सुयोग्य अहा, काहे बरे कि तू ही अपनी इच्छा स सब चीजन क पइदा किहा, अउर तोहरी इच्छा स ओनकर अस्तित्व अहइ। अउर तोहरी इच्छा स ओनकर पैदाइस भय।”

5 फिन मई देखा कि जउन सिंहासन प बिराजमान रहा, ओकरे दाहिने हाथे में एक लपेटा चमड़ा क पत्र मतलब एक अइसी किताब जेका लिखके लपेट दीन्ह जात रहा। जेकरे दुइनुँ कइँती लिखावट रही। ओका सात मोहर लगाइके छाप दीन्ह ग रहा। 2मई एक सक्तिमान सरगदूत कइँती देखेउँ जउन ऊंची आवाज में घोसणा करत रहा, “इ लपटा भवा चमड़न क पत्र मोहरन क तोड़इ अउर एका खोलइ में कउन मनई समर्थ अहइ।” 3मुला सरग में अथवा जमीन प या पताललोक में कउनउँ अइसा नाहीं रहा जउन उ लपटा चर्मपत्र क खोलइ अउर ओका भीतर झँकइ।

4काहेकि उ चर्मपत्र क खोलइ क ताकत रखइवाला या अन्दर स ओका देखइ क ताकत रखइवाला कउनउँ नाहीं मिल पाए रहा। इ बरे मई सुबक सुबक क रोय दीन्ह।

5फिन ओन बुजुर्गन में स एक मोसे कहेस, “रोउब बन्द

चौबीस बुजुर्गन साइद इ चउबीस प्राचीन में बारहु उ सबइ मनई रहेन जउन परमेस्सर क संत लोगन क बडका नेता रहेन। होइ सकत ह अइ सबइ यहुदियन क बारहु परिवार दल क नेता रहेन। अउर बाकी बारह ईसू क प्रेरित अहइँ।

करा! सुना, यहूदा क बंसज क सेर जउन दाऊद क बंसज क अहइ जीत हासिल किहे अहइ। उ एन सात मोहरन क तोड़इ अउर इ लपटा चर्मपत्र क खोलइ में समरथ अहइ।”

6फिन मई देखेउँ कि उ सिंहासन अउर ओन चार प्राणीयन क समन्वा अउर ओन बुजुर्गन क समन्वा एक तु मेमना खड़ा अहइ। उ अइसे देखात रहा जइसे ओकरे बलि चड़ाई ग रही होइ। ओकरे सात सींग रहेन अउर सात आँखी रहिन, जउन परमेस्सर क सात आतिमा अहिन। जेनेका पूरी धरती प भेजा ग रहा। 7फिन उ आवा अउर जउन सिंहासन प विराजमान रहा, ओकरे दाहिने हाथे स उ लपटा चर्मपत्र लइ लिहेस। 8जब उ ओनसे लपटा चर्मपत्र लइ लिहेस तउ ओन चारउ प्राणी अउर चौबीसउ बुजुर्गन उ मेमना क झुकके प्रणाम किहेन। ओनमाँ स प्रत्येक क हाथ में वीना अउर सोने का कटोरा रहेन। उ सब बोलत रहेन: अउर महकत सोने क धूपदान थामे रहेन जउन परमेस्सर क लोगन क पराथना अहइ। 9उ एक नवा गाना गावत रहेन:

“तू अहा चर्मपत्र लेइ क बरे समर्थ अउर एह प लगी मोहर क खोलइ में तोहार बध बलि कीन्ह ग रहा, अउर अपने खून स तू परमेस्सर बरे लोगन क हर जाति स, हर भाखा स सब कुलन स, सब देसन स मोल लइ लिहा।

10अउर बनाया तू ओनका रूप राज्य क अउर हमरे परमेस्सर क हेतु ओनका याजकन बनाया, ओनही धरती प राज करिहइँ।”

11तबहि मई देखेउँ अउर तमाम सरगदूतन क आवाज सुनेउँ। उ पचे सिंहासन, जीवित प्राणीयन अउर बुजुर्गन क चारिहुँ कइँती खड़ा रहेन। अउर उहाँ सरगदूतन क तादाद लाखन करोड़न में रही 12 अउर उ पचे जोर जोर स कहत रहेन:

“जउन मेमना, मारि डाला ग रहा, उ ओका मिलइ क जोगग अहइ बल, धन, विवेक समादर, महिमा अउर स्तुति!”

13फिन मई सुनेउँ कि सरग क, धरती पइ क पाताललोक क, समुद्दर में का, समूची दुनिया क अउर समूचे ब्रह्माण्ड हर एक प्राणी जउन इ जगह में रहत रहा कहत रहेन:

“जउन सिंहासन प बइठा अहइ अउर मेमना! हमेसा हमेसा ओनका स्तुति मिलै, ओनका आदर, महिमा मिलइ।”

14फिन उ चारिहुँ प्राणी कहेन, “आमीन!” कहेन अउर बुजुर्गन झुकके आराधना करेन।

6 मई देखे कि मेमना ओहमाँ स पहली मोहर तोड़ेस अउर तबहि ओन चार प्राणीयन में स एक क बादर क तरह गरजत आवाज में कहत सुनेउँ, “आ!” 2जउ मई आपन नजर उठाएउँ तउ पाएउँ कि मोरे सामने एक तु सफेद घोड़ा रहा। घोड़ा क सवार धनुस लिए रहा। ओका विजय मुकुट दीन्ह गवा अउर उ विजय पावइ क बरे जीत पाइ क बाहर चला गवा।

3जब मेमना दूसर मोहर तोड़ेस तउ मई दूसर प्रानी क कहत सुनेउँ, “आवा!” 4एह प आगी क तरह लाल रंग क एक अउर घोड़ा बाहेर आवा। एकरे ऊपर बइठे सवार क धरती स सान्ति छीन लेइ अउर एक दूसरे क हत्या करवावइ क बरे उकसावइ क अधिकार दीन्ह ग रहा। ओका एक तु लम्बी तलवार दइ दीन्ह गइ।

5जब मेमना तीसरी मोहर तोड़ेस तउ मई एक प्रानी क कहत सुनेउँ, “आवा!” जब मई आपन नजर उठाएउँ तउ हुवाँ मोरे सामने एक तु काला घोड़ा खड़ा रहा। ओह प बइठे सवार क हाथे मँ एक तराजू रही। 6उही समइ मई ओन चारउ प्रानीयन क बीच स एक आवाज आवत सुनेउँ, जउन कहत रहा, “एक दिन क मजूरी क बदले एक दिन क खाइ क गोहूँ अउर एक दिन क मजूरी क बदले तीन दिन तक खाइ क जौ। मुला जैतून क तेल अउर दाखरस क नुकसान न पहुँचावा!”

7इ फिन मेमना जब चौथी मोहर खोलेस तउ चौथे प्रानी क कहत सुनेउँ, “आवा!” 8फिन जब मई नजर उठाएउँ तउ मोरे सामने मरियल जइसा एक पीला रंग का घोड़ा खड़ा रहा। ओह प बइठके सवार क नाउँ रहा “मउत”। अउर ओकरे पाछे पाछे सटा चलत रहा अधोलोक। धरती क एक चौथाई हिस्सा प ओनका इ अधिकार दइ दीन्ह ग कि लड़ाई, अकाल, महामारी अउर धरती क हिंसक जानवर ओनका सबेन्ह क मार ड़ावइँ। 9फिन उ मेमना जउ पाँचवी मोहर तोड़ेस तब मई वेदी क नीचे ओन आतिमन क देखेउँ जेनके परमेस्सर क सुसंदेस कइँती आतिमा क अउर जउने साच्छी क उ पचे दिहे रहने, ओकरे कारण हत्या कइ दीन्ह गइ। 10जोर स आवाज देत उ पचे कहेन, “हे पवित्तर अउर सच्चा पभू! हमार हत्या करइ क बरे धरती क मनइयन क निआव करइ क अउर ओनका दण्ड देइ क बरे तू कब तक इन्तजार करत रहब्या?” 11ओनमाँ स सबका एक सुफेद चोंगा दीन्ह गवा अउर ओनसे कहा गवा कि तनिक देर तक उ पचे समइ इ इन्तजार करइँ जब तलक ओनके ओन साथी सेवकन अउर भाइयन क तादाद पूरी होइ जात ह जेनकइ वइसेन हत्या कीन्ह जाइवाली अहइ, जइसेन तोहार कीन्ह ग रही।

12फिन जब मेमना छठवी मोहर तोड़ेस तउ मई देखेउँ कि हुवाँ एक बहुत बड़ा भूचाल आवा भवा अहइ। सूरज अइसे काला होइ ग रहा जइसे बालन स बना कपड़ा होय जात ह। अउर पूरा चाँद खून क तरह लाल होइ जात ह। 13आकास क तारा धरती प अइसा गिर ग रहने जइसे कउनउँ तेज आंधी स झकझोर दिहे प अंजीर क पेड़ स कच्ची अंजीर गिर जात ही। 14आसमान फटा पड़ा रहा अउर एक चर्मपत्र क तरह सिकुरिके लपट ग रहा। सब पर्वत अउर द्वीप अपनी अपनी जगह स ढिग ग रहने।

15दुनिया क सम्राट, सासक, धनी, सक्तिसाली अउर सब लोग अउर सब मालिक अउर गुलाम अपने आपका चट्टानन क बीच अउर गुफा मँ अपने आपका छिपाइ लिहे रहने 16उ पचे पर्वतन अउर चट्टानन स कहत रहने: “हमरे ऊपर गिर पड़ा अउर जउन मनई सिंहासन प बइठा अहइ ओकरे अउर मेमना क गुस्सा स हम पचे क बचाइ ल्या!

17ओनकी गुस्सा क भयंकर दिन आय ग अहइ अइसा के अहइ जे एका झेल सकइ।”

इस्त्राएल क 1,44,000 मनइयन

7 एकरे बाद धरती क चारउँ कोनन प चार सरगदूतन क मई खड़े देखेउँ धरती क चारउँ हवा क उ पचे पकड़े रहने जइसे कि धरती प, समुद्र प अथवा पेड़न प ओनमाँ स कउनउँ हवा चलइ न पावइ। 2फिन मई देखेउँ कि एक अउर सरगदूत अहइ जउन पूरब दिसा स आवत अहइ। उ जिअत परमेस्सर क मोहर लिहे रहा। अउर उ ओन चारउ सरगदूतन स जेनका धरती अउर आसमान क नस्ट कइ देइ क अधिकार दीन्ह ग रहा, जोर स पुकार क कहत रहा, 3“जब तक हमने अपने परमेस्सर क सेवकन क माथे प मोहर नाहीं लगाइ देइतन, तब तलक तू धरती, समुद्र अउर पेड़न क नुकसान न पहुँचावा।”

4फिन जउन मनइयन प मोहर लगाई ग रही, मई औनकइ तादाद सुनेउँ। उ 1,44,000 रहने जेनकइ ऊपर मोहर लगाई ग रही, उ सब इस्त्राएल क सब परिवार समूहन स रहेन:

5यहूदा क परिवार समूह क	12,000
रूबेन क परिवार समूह क	12,000
गाद क परिवार समूह क	12,000
6आसेर परिवार समूह क	12,000
नफ्ताली परिवार समूह क	12,000
मनस्से परिवार समूह क	12,000
7समौन परिवार समूह क	12,000
लेवी परिवार समूह क	12,000
इस्साकार परिवार समूह क	12,000
8जबूलून परिवार समूह क	12,000
यूसुफ परिवार समूह क	12,000
बिन्यामीन परिवार समूह क	12,000

भयंकर भीड़

9एकरे बाद मई देखेउँ कि मोरे सामने एक बहुत बड़ी भीड़ रही जेकर कउनउँ गनती नाहीं कइ सकत रहा। इ भीड़ मँ हर जाति क, हर वंस क, हर कुल अउर हर भाखा क मनई रहने। उ पचे उ सिंहासन अउर उ मेमना क आगे खड़ा रहेन। उ सबेन्ह सफेद चोंगा पहिरे रहने अउर अपने हाथे मँ खजूर क टहनी लिहे रहने। 10उ सबेन्ह बोलावत रहने, “सिंहासन प बइठा हमरे परमेस्सर क जय होइ अउर मेमना क जय होइ।” 11सभी सरगदूतन सिंहासन, बुजुर्गन अउर ओन चार प्रानीयन क घेरे खड़ा रहेन। सिंहासन क सामने झुकिके प्रणाम कइके ओन सरगदूतन परमेस्सर क आराधना किहेन। 12उ पचे कहेन, आमीन हमरे परमेस्सर क स्तुति, महिमा, विवेक, धन्यवाद, समादर, पराक्रम अउर सक्ति हमेसा हमेसा होत रहइ। आमीन!”

13तबहि ओन बुजुर्गन मँ स कउनउँ एक मोसे इ पूछेस, “इ सफेद चोंगा पहिरे कउन मनई अहइँ अउर इ कहाँ स आए अहइँ?”

14मई ओनका जवाब दिहेउँ, “मोर पभू तू तउ जनतइ अहा।”

इ सुनिके उ मोसे कहेस, “इ पचे उहइ मनई अही जउन कठोर अत्याचार क बीच स होइके आवत अहई उ सबेन्ह आपन चोगा मेमना क खून स धोइके सफेद अउर उज्जर करे अहइ। 15इही बरे अउर इ पचे परमेस्सर क सिंहासन क समन्वा खड़ा अहई अउर ओनके मंदिर में दिन रात ओकर आराधना करत ही। जउन सिंहासन पर बइठा बा, उ ओन पर आपन छाया करी। 16न तउ कबहूँ ओनका भूख सतावात ह अउर न तउ कबहूँ पियासा रहत ह। सूरज ओनकइ कछू नाहीं बिगाड़ पावत अउर न तउ चिलचिलात धूप ओनका कबहूँ तपावत ह। 17काहेकि उ मेमना जउन सिंहासन क बीच में अहइ, ओनकइ देखभाल करी। अउर ओनकर चरवाहा होइ। उ ओनका जिन्दगी देइ वाले पानी क झरना क पास लइ जाई अउर परमेस्सर ओनकी आंखिन क आंसू क पोछ देई।”

सातवी मोहर

8 फिन मेमना जब सावती मोहर तोड़ेस तउ सरग मँ करीब आधा घन्टा तक सन्नाटा छावा रहा। 2फिन मई सात सरगदूतन देखेउँ जउन परमेस्सर क सामने खड़ा रहेन। ओनका सात तुरही दीन्ह गइ रहिन।

3फिन एक अउर सरगदूत आवा अउर वेदी प खड़ा होइ गवा। ओकरे लगे सोने क एक ठु धूपदान रहा। ओका परमेस्सर क पवित्र लोगन क पराथना क साथ सोने क उ वेदी प जउन सिंहासन क समन्वा रही चढ़ावइ क बरे तमाम धूप दीन्ह गइन। 4फिन सरगदूत क हाथे स धूप क उ धुओँ परमेस्सर क लोगन क पराथना क साथे परमेस्सर क समन्वा पहुँचा।

5एकरे बाद सरगदूत उ धूपदान क उठाएस, ओका बेदी क आग स भरेस अउर उचल क धरती प फेंक दिहेस। तब हुवाँ गरजना भइ, भयंकर आवाज आवइ लाग अउर बिजली चमकइ लाग। भूकम्प आइ गवा।

सातहूँ सरगदूतन क आपन तुरही बजाउब

6फिन उ सात सरगदूतन जेकरे लगे सात तुरही रहिन, ओनका फूकइ क बरे तय्यार होइ गएन।

7जइसेन पहिला सरगदूत तुरही मँ फूँक मारेस, वइसेन खून, ओला, अउर आग एकइ साथे देखाइ लागेन अउर ओनका धरती प नीचे उछालिके फेंक दीन्ह गवा। जउने स धरती एक तिहाई हिस्सा जलभुन क राख होइ गवा। एक तिहाई पेड़ जलत भए राख होइ गएन अउर संसार क पूरी घास राख होइ गइ।

8दूसरा सरगदूत जब तुरही मँ फूँक मारेस तउ अइसा लगा जइसे आग क एक जलत विसाल पहाड़े क समान कउनो चीज समुदर मँ फेक दीन्ह गइ होइ। एहसे एक तिहाई समुदर खून मँ बदल गवा। 9अउर समुदर क एक तिहाई जीवित प्राणी मरि गएन अउर एक तिहाई पानी क जहाज विलाइ गएन।

10तिसरा सरगदूत जब तुरही मँ फूँक मारेस तउ आकास स मसाल क तरह जरत भवा एक बड़का तारा गिर पड़ा इ तारा एक तिहाई नदियन अउर झरनन क पानी प जाइ गिरा। 11इ तारा क नाउँ रहा “नागदौना” जउन समूचे पानी क एक तिहाई हिस्सा नागदौना* मँ बदल गवा। अउर उ पानी क जे पियेस ह बहुत मनई मर गएन। काहेकि पानी बहुत तीत होइ ग रहा।

12जउ चौथा सरगदूत तुरही मँ फूँक मारेस, तउ एक तिहाई सूरज अउर साथे मँ एक तिहाई चन्द्रमा अउर एक तिहाई तारन प आफत आइ गइ। ओनकइ एक तिहाई हिस्सा काला पड़ गवा। इ तरह स एक तिहाई दिन अउर एक तिहाई रात अन्धेरे मँ बूड़ गएन।

13फिन मई देखेउँ कि एक गरुड़ अबइ ऊँच अकास मँ उड़त रहा। मई ओका जोर स कहत सुनेउँ, “जउन तीन सरगदूत बचा अहई अउर आपन तुरही बचावइवाला अहइ, ओनके तुरही बजाए स धरती प रहइवाले प बिपत्ति आवइ! बिपत्ति आवइ! बिपत्ति आवइ!”

9 जब पाँचवा सरगदूत आपन तुरही मँ फूँक मारेस, तब मई आकास स धरती प गिरा भवा एक तारा देखेउँ। एका उ चिमनी क कुंजी दीन्ह ग रही जउन पाताल मँ उतरत ह। 2फिन उ तारा उ चिमनी क ताला खोल दिहेस जउन पाताल मँ उतरत रही अउर चिमनी स वइसेन धुआं फूट गवा जइसेन एक बड़ी भट्टी स निकरत ह। इ बरे चिमनी स निकरा धुँआ स सूरज अउर आसमान काला पड़ गएन। 3तबही उ धुँआ स धरती प टिड्ढि दल उतर आवा। ओनके पास उहइ ताकत रही जउन धरती प रहइवाले बिच्छुअन मँ रहत ह।

4मुला ओनसे कह दीन्ह ग रहा कि उ धरती क घास क कउनउँ नुकसान न पहुँचावई अउर न तउ हरिअर पेड़ पउधा क कउनउँ नुकसान पहुँचावई ओनका केवल ओनही मनइयन क नुकसान पहुँचावई क रहा जेकरे माथे प परमेस्सर क मोहर नाहीं लगी रही।

5टिड्ढि दल स इ भी कहा ग रहा कि उ मनइयन क प्रान न लेई ओनका पाँच महीना तक पीड़ित करत रहई। ओनका जउन कस्त दीन्ह जात रहा, उ उही तरह क रहा जइसे बिच्छू क काटइ स रहत ह। 6उ ओहि दिनन उ मनई मउत क डूड़िहई, मुला मउत ओनका न मिलपाई उ पचे मरइ क बरे तरसिहई अउर मउत ओनका चकमा दइके चली जाई।

7अउर अब देखा कि उ टिड्ढि लड़ाई मँ लड़इ क बरे तैय्यार घोड़न क तरह देखात रहिन। ओनके माथे प चमकीला मुकुट बँधा रहेन। अउर ओनकर मुँह मनइयन क मुँहन जइसे रहेन। 8ओनके बार स्त्रियन क बार क तरह रहेन अउर ओनकइ दाँत सेर क दाँत क तरह रहेन। 9ओनकइ सीना अइसा रहेन जइसे लोहा क कवच होई।

नागदौना मूल मँ अपसिन्तोस जउन यूनानी भाखा क सब्द अहइ अउर जेकर अग्रेजी पर्याय बाटइ वर्मवुड जेकर अरथ अहइ एक ठु बहोतइ करुवा पौधा। यह बरे एँका बहोतइ दुःख क चीन्हा माना जात ह।

ओनकइ पखना क आवाज लड़ाई में जात बहुत घोड़े अउर रथ क आवाज क तरह रहेन। 10ओनकी पूँछ रहेन जइसे बीछू क डंक होई अउर ओहमाँ पाँच महीना तक लोगन क दुःख पहुँचावइ क ताकत रही। 11पाताल क अधिकारी दूत क उ पचे अपने राजा क तरह लिहे रहेन। इब्रानी भाखा में ओनकइ नाउँ अहइ, “अबडुोन”* अउर यूनानी भाखा में ओका “अपुल्लयोन” (नास करइ वाला) कहा जात रहा।

12पहली बड़ी आफत तउ बीत गइ अहइ मुला एकरे बाद दुइ बिपति बड़ी अउर पड़इवाली अहइ।

13फिन जइसेन छठवाँ सरगदूत आपन तुरही फूँकेस, वइसेन ही मई परमेस्सर क समन्वा एक चमकीली वेदी देखेउँ, ओकरी चार सींग में स आवाज आवत रही। 14तुरही लिहे छठवें सरगदूत स उ आवाज कहेस, “ओन चार सरगदूतन क छोड़ द्या जउन फरात महानदी क लगे बंधा पड़ा अहई।” 15बरे चारउ सरगदूत क छोड़ दीन्ह गवा। उ पचे उही समइ, उही दिन, उही महीने अउर उही साल क बरे तय्यार रखा ग रहेन जइसेन कि एक तिहाई मनइयन क मार ड़ावई। 16ओनके पूरी तादाद केतनी रही, इ मई सुनेउँ। घोड़ा प चड़े सैनिकन क तादाद 200,000,000 रही।

17उ मोरे दर्सन में उ घोड़ा अउर ओनके सवार मोका इ तरह देखेई पड़ेन: उ सबेन्ह कवच पहिरे रहेन जउन धधकत आग जइसे लाल लाल, गहरे नीला अउर गन्धक जइसे पीला रहेन। घोड़न क मूँडइ सिंहन क समान रहेन अउर ओनके मुखन स अग्नि, धुँआ तथा गन्धक निकरत रहा। 18इ तीन महामारी स मतलब ओनके मुँहे स निकरत आगी, धुँआ अउर गन्धक स एक तिहाई मनइयन क मार ड़ावा गवा। 19एँन घोड़न क ताकत ओनके मुँहे अउर पूँछ में रही, काहेकि ओनके पूँछ मुँडवाले साँप क तरह रही जउने स उ मनइयन क नुकसान पहुँचावत रहेन।

20एतने क बावजूद जउन मनई इ सत्यानास स नाहीं मारा गएन अउर जे आपन हिरदय तथा मनफिरावा पे रहा, अउर जउन अबे तक परेत, सोना, चाँदी, काँसा, पाथर अउर लकड़ी क मूर्तियन क पूजा नाहीं छोड़े रहेन जउन कि न देख सकत ही न बोल सकत ही, न चल सकत ही अउर न सुन सकत ही। 21उ पचे आपन हिरदय अउर मन नाहीं बदलेन तथा अपने द्वारा कीन्ह हत्या, जादू टोना, यौन अनाचार अउर चोरी चकारी क कउनउँ पछतावा नाहीं रहा।”

सरगदूत अउर छोटी पोथी

10 फिन मई अकास स नीचे उतरत एक अउर बलवान सरगदूत क देखेउँ उ बादर क ओड़े रहा अउर ओकरे मूँडे क आस पास एक मेघधनुस रहा। ओकर मुख मण्डल सूरज क तरह अउर टांग आग क खंभा जइसे रहेन। 2आपने हाथे में उ एक छोटी स खुली पोथी लिहे रहा। 3आपन दहिना पैर समुद्र में अउर बाया पैर धरती प रखेस। फिन उ सेर क तरह दहाड़त जोर स चिल्लाएस। ओकरे चिल्लाए प सातउ गरजन तरजन क आवाज सुनाई देइ लाग जउन सातउ गरजन होइ चुकेन। 4अउर मई लिखइवाला रहेउँ, तबइ मई एक आकासवाणी सुनेउँ,

“सातउ गरजन जउन कछू कहे अहइ, ओका छिपाय ल्या अउर ओका न लिखा।”

5फिन उ सरगदूत जउने क मई समुद्र में अउर धरती प खड़ा देखे रहेउँ, अकास में ऊपर दाहिन हाथ उठाएस। 6अउर जउन हमेसा स जीवित अहइ, जे अकास क अउर अकास क सब चीजन क, धरती अउर धरती प किहेस अउर समुद्र अउर जउन कछू ओहमाँ अहइ, ओनकइ सबनक रचना करे अहइ, ओकर सपथ लइके सरगदूत कहेस, “अब अउर जियादा देर न होइ! 7मुला जउ सातवों सरगदूत क सुनइ क समइ आइ अर्थात जब उ आपन तुरही बजावइवाला होइ, तबइ परमेस्सर क उ छिपी योजना (सुसमाचार) पूरी होइ जाइ जेका उ अपने सेवक अउर नबियन क बताए रहा।”

8उ आकासवाणी जउने कि मई सुने रहेउँ, उ आवाज फिन मोसे कहेस, “जा अउर उ सरगदूत स जउन समुद्र में अउर धरती प खड़ा अहइ ओकरे हाथे स खुली पोथी क लइ ल्या।”

9इ बरे मई उ सरगदूत क पास गएँ अउर मई ओसे कहेउँ कि उ छोट क पोथी मोका दइ देइ। उ मोसे कहेस, “एका ल्या अउर खाइ ल्या। एहसे तोहार पेट कड़वा होइ जाइ मुला तोहरे मुँहे में इ सहदउ स जिआदा मीठा बन जाइ।” 10फिन उ सरगदूत क हाथ स मई उ छोट क पोथी लइ लीन्ह अउर ओका खाइ लीन्ह। मोरे मुँहे में इ सहद क तरह मीठ लाग मुला जब मई खाइ चुकेउँ तब मोर पेट कड़वा होइ गवा। 11एह प उ मोसे बोला, “तोहका तमाम मनई, देस, जातियन क भाखा अउर राजा क बावत भविस्सवाणी करइ क पड़ी।”

दुइ साच्छी

11 एकरे बाद नापइ क बरे मोका एक सरकंडा दीन्ह गवा जउन नापइ वाली छड़ी क तरह दिखाई पड़त रही। मोसे कहा गवा, “उठा अउर परमेस्सर क मंदिर क अन्दर वेदी क नाप ल्या अउर जउन मनई मंदिर क अन्दर आराधना करत अहइ, ओनके गिनती करा। 2मुला मंदिर क बाहर आंगन क रहइ द्या, ओका न नापा काहे बरे कि इ गौर यहूदियन क दीन्ह ग अहइ। उ पचे बयालीस महीना तक पवित्तर नगर क अपने पैर क नीचे रौद देइही। 3मई अपने दुइ गवाहन क खुली छूट देब अउर उ 1,260 दिन तक भविस्सबाणी करिहई उ पचे टाट क कपरा पहिने रइही जेनका दुःख परगट करइ क बरे पहिना जात ह।”

4इ दुइनउँ साच्छी उ दुइ जइतून क पेड़ अउर उ दुइ तु दीपादान अहई जउन धरती क पर्भू क समन्वा अहई। 5जदि केउ ओनका नुकसान पहुँचावा चाहत ह तउ ओकरे मुँहे स आग निकरइ लागत ह अउर ओनके दुम्मनन क निगल लेत ह। जदि केउ ओनका नुकसान पहुँचावइ क कोसिस करत ह तउ ओकर मउत निश्चित तौर प होइ जात ह। 6उ पचे अकास क बादल बाँधके रखइ क ताकत रखतही जेहसे जब उ पचे भविस्सबाणी करत होई तउ ओ समइ पानी न बरसी। ओनकै झरनन क पानी प अधिकार रहा जेका उ पचे खून में बदल सकत रहेन। ओनमाँ अइसी ताकत रही कि उ

जेतना बार चाहतेन, ओतनी बार धरती प हर तरह क विनास कइ सकत रहेन।

7ओनके साच्छी दइ चुकइ क बाद, उ जानवर महागर्त स बाहर निकरी अउर ओन पइ हमला करी। उ ओनका हराइ देइ अउर मारि ड़ाई। 8ओनकर ल्हास महानगर क गलियन में पड़ी रहिहई। इ सहर क प्रतीक रूप में सदोम अउर मिन्न कहा जात रहा। हिओँ प ओनकर पभूँ क क्रूस प चड़ाइके मारा ग रहा।

9सब जातियन, उपजातियन, भाखा अउर रास्ट्र क मनई ओनकी ल्हास क साड़े तीन दिन तक देखत रइही, अउर ओनकी ल्हास क कब्र में न रखइ देइही।

10धरती प रहइवाले आनन्द मनईहई उ पचे त्यौहार मनईहई अउर एक दूसर क तोहफा देइहई। इ दुइनउँ नबियन धरती प रहइवाले मनइयन क बहुत दुःख दिहे अहई।

11मुला साढ़े तीन दिन क बाद परमेस्सर कइँती स ओनके जीवन में सास आइ गइ अउर उ पचे अपने गोड़े प खड़ा होइ गएन। जे ओनका देखे रहेन, उ पचे बहुत ड़ेराइ गएन। 12फिन उ दुइनउँ नबियन जोर क आवाज में आकासबाणी क ओनसे कहत भए सुनेन, “हिओँ ऊपर आइ जा!” इ बरे उ अकास क भीतर बादल में ऊपर चला गएन। ओनका ऊपर जात ओनकर खिलाफत करइवाले देखेन।

13ठीक उही समइ प हुवा बहुत बड़ा भूचाल आइ गवा अउर सहर क दसवा हिस्सा इह गवा। भूचाल में सात हजार मनई मारा गएन अउर जउन बच ग रहेन उ सबेन्ह बहुत ड़ेराइ गएन अउर उ सरग क परमेस्सर क महिमा क बखान करइ लागेन।

14इ तरह स अब दूसरउ आफत बीत गइ। मुला सावधान! तीसरी महाविपत्ति जल्दी आवइवाली अहइ।

सातवी तुरही

15सातवाँ सगरदूत जब आपन तुरही फूँकैस तउ सरग स जोर क आवाजन आवइ लागिन। उ सबइ कहत रहिन:

“अब इ दुनिया क राज हमरे पभूँ क बाटइ, अउर ओकरे मसीह क बाटइ। अउर उ कई जुग तक सासन करी।”

16अउर उही समइ परमेस्सर क समन्वा अपने अपने सिंहासन प बइठा चौबीसउ बुजुर्गन दण्डित प्रणाम कइके परमेस्सर क आराधना किहेन। 17उ पचे बोलेन:

“सर्वसक्तिमान पभूँ परमेस्सर तू अहा, तू रह्या हम तोहार धन्यवाद करत अही।” तुहिन आपन महासक्ती क लइके अपने सासन क सुरुआत करे रह्या।

18जउ अउर रास्ट्रन गुस्सन स भरी रहिन मुला तउ तोहार कोप प्रकट होइ क समइ आइ गवा, अउर क निआव क समइ आइ ग अहइ, अउर उ समइ आय ग अहइ जउ तोहार सेवक फल पइहई ओन नबियन अउर उ सब पवितर मनई जउन तोहार आदर करत रहेन। अउर सभी जेतना बड़े

मनई अहई, अउर सभी जेतने छोटे मनई अहई। सब अपने काम क फल पावई। जउन मनई धरती क मिटावत अहई, ओनके मिटावइ क समइ आइ ग अहइ।”

19फिन सरग में परमेस्सर क मंदिर क खोला गवा जहाँ ओकरे मंदिर में करार क उ पेटी देखाई पड़ी। फिन बिजली क चकाचौध होइ लगी। मेघन क गरजन, तरजन, अउर घड़घड़ाहट क आवाज, भूकम्प अउर भयानक ओला बरसइ लागेन।

स्त्री अउर बड़ा क अजगर

12 एकरे बाद आसमान में एक बड़ी स निसानी परगट भइ: एक स्त्री दिखाई पड़ी जउन सूरज क धारन करे रही अउर चाँद ओकरे पाँव क नीचे रहा। ओकरे माथे प मुकुट रहा, जेहमाँ बारह तारा जड़ा रहेन। 2उ गर्भवती रही। ओकर दिन निकटाइ ग रहा, इ बरे उ पीड़ा स कराहत रही। 3सरग में एक निसानी प्रकट भइ। मोरे समन्वा एक तु इ लाल रंग क बड़ा क अजगर खड़ा रहा। ओकरे सातउ क सिर प सात मुकुट रहेन। 4ओकर पूँछ आकास क तारन क एक तिहाई हिस्सा क सपाटा मारिके धरती प नीचे फेंक दिहेस। उ स्त्री जउन बच्चा पइदा करइवाली रही ओकरे समन्वा उ अजगर खड़ा होइ गवा जइसे कि जउन बच्चा पइदा होइ, ओका उ खाइ जाइ। 5फिन उ स्त्री एक बच्चा क जन्म दिहेस जउन कि लरका रहा। ओका सब जातिन प लोहे क दण्ड क साथ सासन करइ क रहा। मुला ओकर बच्चा क उठाइके परमेस्सर अउर ओकरे सिंहासन क समन्वा लइ जावा गवा। 6अउर उ स्त्री सूनसान जंगल में भाग गइ। ओका एक अइसी जगह रखा गवा जउने क परमेस्सर उही बरे बनवाए रहा, जइसे कि ओका 1,260 दिन तक जीवित रखा जाइ सकइ।

7फिन सरग में एक लड़ाई होइ लाग मीकाएल अउर ओकरे सगरदूतन क उ भयंकर अजगर स लड़ाई होइ लाग। उ अजगर भी ओकरे दूतन क साथ लड़ाई लइसे। 8मुला उ ओनके ऊपर भारी नाहीं पड़ा अउर उ भयंकर अजगर अउर ओकर सगरदूतन सरग में आपन जगह खोइ दिहेन। 9फुन उ अजगर सरग क नीचे ड़केल दीन्ह गवा। इ उहइ पुरान महानाग बाटइ जेका दानव अउर सइतान कहा ग अहइ। इ पूरी दुनिया क ठगत ह हैं, एका फिन धरती प ढकेल दीन्ह गवा। 10फिन मई जोरदार आवाज में एक आकासबाणी क कहत सुनेउँ, “इ हमरे परमेस्सर क जीत क घड़ी अउर सासन बाटइ। उ आपन ताकत अउर संप्रभुता क जनवाइ देहेस। ओका मसीह आपन ताकत क देखाइ दिहेस काहेकि हमरे भाइयन प परमेस्सर क सामने दिन रात लांछन लगावइवाला क नीचे ड़केल दीन्ह गवा। 11उ पचे मेमना क बलिदान क खून अउर ओकरी साच्छी स ओका हराइ दिहेन। उ पचे अपने प्राणन क गवाँइ देइ तलक अपने जीवन क परवाह नाहीं किहेन। 12इ बरे हे सरग, अउर सरग में रहइवाले मनई खुसी मनावा! मुला हाय धरती अउर समुद्र! तोहरे बरे केतना बुरा होई काहे बरे कि सइतान अउर हुवाँ उतरके गवा अहइ। उ गुस्सा स तमतमात अहइ।

ओका पता अहइ कि अउर ओकरे पास अधिक समइ नाहीं अहइ।”

13जब उ भयंकर अजगर देखेस कि ओका धरती प गिराइ दीन्ह ग अहइ तउ उ स्त्री क पीछा करइ लाग जउन कि बचवा क जनम दिहे रही। 14मुला उ स्त्री क उकाब क दुइ तु बड़ा बड़ा पखना दीन्ह ग रहेन जइसे कि उ रेगिस्तान में उड़ जाइ, जउन ओकरे बरे तइयार कीन्ह ग रहा। हुवउँ प भयंकर अजगर स दूर ओका साड़े तीन साल तक पालन पोषण कीन्ह जाइ क रहा। 15तउ उ महानाग उ स्त्री क पाछे अपने मुँह स नदी क तरह पानी क धारा बहाएस जइसेन कि उ ओहमाँ बूड़ जाइ। 16मुला धरती आपन मुँह खोलके उ स्त्री क मदद किहेस अउर उ भयंकर अजगर जउने नदी क अपने मुँह स निकारे रहा, ओका निगल लिहेस। 17एकरे बाद तउ उ भयानक अजगर उ स्त्री क ऊपर बहुत गुस्सा करेस अउर ओकरे बचवन क साथ लड़ाई लड़इ क बरे चल पड़ा जउन कि परमेस्सर क हुकुमन क पालन करत ही अउर ईसू क साच्छी क धारण करत ही 18अउर समुद्र क किनारे जाइके खड़ा होइ गवा।

डूइ जानवर

13 फिन मई समुद्र में स एक जानवर क बाहर आवत देखेउँ। ओकरे दस सीग रहिन अउर सात मूँड रहेन। उ अपने सीग प दस राजसी मुकुट पहिने रहा। ओकरे मूँडे प दुस्ट नाउँ लिखा रहेन। 2मई जउन जानवर देखे रहेउँ उ चीता क तरह रहा। ओकरे पैर भालू क तरह रहेन अउर ओकरे मुँह सेर क तरह रहा। उ भयंकर अजगर आपन ताकत, आपन सिहांसन अउर आपन डेर अधिकार दइ दिहेस। 3मई देखेउँ कि ओकर एक मूँड अइसेन देखात रहा जइसेन ओकरे ऊपर कउनउँ बड़ा प्रान घातक घाव लगा रहा होइ मुला ओकर प्रान घातक घाव भर चुका रहा। पूरी दुनिया अचरज करत उ जानवर क पीछे चलइ लाग। 4अउर उ पचे अजगर क पूजा करइ लागेन। काहे बरे कि उ आपन अधिकार उ जानवर क दइ दिहे रहा। अउर उ पचे उ जानवर क पूजा करत कहइ लागेन, “इ जानवर क तरह हिआँ कउन अहइ? अउर अइसा के अहइ जे ओसे लड़ सकइ?”

5ओका अनुमति दइ दीन्ह गइ जइसे कि उ अपने मुँह स घमंड अउर परमेस्सर क निन्दा भरी बात बोलइ। ओका बयालीस महीना तक आपन ताकत देखावइ क अधिकार दीन्ह ग रहा। 6इ बरे उ परमेस्सर क निन्दा सुरु कइ दिहेस। उ परमेस्सर क नाउँ, अउर ओनकै मंदिर अउर जउन सरग में रहत ही ओनकर निन्दा करइ लाग। 7परमेस्सर क पवित्र लोगन क साथे लड़ाई लड़इ क अउर ओनका हरवै क अनुमति ओका दइ दीन्ह गइ। ओकर अधिकार हर वंस, हर जाति, हर भाखा अउर हर राष्ट्र पर रहा। धरती क सभी निवासी उ जानवर क पूजा करिहइ जेकर नाम उ मेमना क जीवन क पुस्तक में संसार क आरम्भ स नाहीं लिखा अहइ अउर जेकर बलिदान एकदम पक्का अहइ।

9जदि केउ क कान अहई तउ उ सुन लेइ:

10बंदीघर में बन्दी बनइ क जेकरे तकदीर में अहइ, उ

जरूर बन्दी होइ। जदि केहू तलवार स मारी तउ उहइ तलवार स मारा जाई।

वह अइसे समइ मँ परमेस्सर क पवित्र लोगन क सहनशीलता अउर बिसवास क देखावइ चाही।

11एकरे बाद मई धरती स निकरत एक अउर जानवर क देखेउँ। ओकरे मेमना क सीग क तरह दुइ तु सीग रहिन। मुला उ महानाग क तरह बोलत रहा। 12उ भयानक अजगर क समन्वा उ पहिले जानवर क सभी अधिकारन क इस्तेमाल करत रहा। उ धरती अउर धरती क निवासिन सबसे उ जानवर क पूजा कराएस जउने क भयंकर घाव भर ग रहा। 13दूसरउ जानवर बड़ा बड़ा अद्भुत कारजन करेस। हिआँ तक कि सबके सामने उ धरती प आकास स आग बरसाइ दिहेस। 14उ धरती प रहइ वालेन क ठगत रहा काहेकि ओकरे पास पहले जानवर क सामने अद्भुत कारजन दिखावइ, क ताकत रही। दूसरा जानवर धरती प रहइवालेन स पहिले जानवर क आदर देइके ओकर मूर्ति बनावइ क कहेस। जउन तलवार क मार स घायल रहा पर मरा नाहीं। 15दूसरे जानवर क इ ताकत दीन्ह ग रही कि उ पहिले जानवर क मूर्ति में जान फूँके देई जइसे कि मूर्ति पहिले जानवर क तरह बोलइ लागइ, हिआँ तक कि ओनका मारइ क आग्या दइ देइ जउन कि मूर्ति क पूजा नाहीं करतेन।

16-17दूसरा जानवर सभी लोगन का छोटा-बड़ा, धनी-गरीब, मालिक दास, पुत्र अउर गुलाम सबका मजबूर करेस कि अपने दाहिने हाथे प या दाहिने माथे प उ जानवर क नाउँ या ओकरे नाम स जुड़ी छाप क छाप लगावावई। जइसे कि बिना उ छाप क कउनउँ चीज न तउ खरीदी जाय सकइ अउर न तउ बेची जाइ सकइ। 18बुद्धिमानी ऐहिमाँ अहइ जेहमा बुद्धि होइ, उ जानवर क संख्या क हिसाब लगाइ लेइ काहेकि उ संख्या क सम्बन्ध कउनउँ मनई स अहइ। ओकर संख्या अहइ 666।

छुड़ा मनइयन क गाना

14 फिन मई देखेउँ कि मोरे समन्वा सिव्योन पर्वत प मेमना खड़ा अहइ। ओकरे साथे 1,44,000 मनई खड़ा रहेन जेकरे माथे प ओकर अउर ओकरे बाप क नाम लिखा रहा। 2फिन मई एक आकासबाणी सुनेउँ ओकर महानाद एक विसाल जल प्रपात क तरह रहा यो भयंकर बादर क गरजइ क तरह रहा। जउन महानाद मई सुनेउँ रहा उ तमाम वीणू बादकन क बजावा वीणा स पड़व संगीत क तरह रहा।

3उ सबेन्ह सिंहासन चारउँ प्रानीयन अउर बुजुर्गन क सामने एक तु नवा गाना गावत रहेन। जउने 1,44,000 मनइयन क धरती प फिरौती दइके बन्धन स छुड़ाइ लीन्ह ग रहा, जउने क कउनउँ मनई उ गाना क नाहीं सिख सकत रहा। 4उ अइसेन मनई रहेन जउन कि कउनउँ स्त्री क संसर्ग स आपन का दूसित नाहीं किए रहेन साथ जुड़ा नाहीं रहेन, उ पचे कुँवारा रहेन, जहाँ जहाँ मेमना जात रहा ओकर पीछा करत रहेन। पूरी मनइयन क जाति स ओनका फिरौती

दइके बंधन स छुटकारा दीन्ह ग रहा। उ पचे परमेस्सर अउर मेमना क बरे फसल क पहिला फल रहेन। 5उ कबहुँ झूठ नाहीं बोले रहेन, अउर निर्दोस रहेन।

तीन सरगदूत

6फिन मई आसमान में जँची उड़ान भरत एक अउर सरगदूत देखेउँ। ओकरे लगे धरती प रहइ वालेन, हर देस, जाति, भाखा अउर सभी कुल क मनइयन क बरे अनन्त सुसमाचार क एक संदेस रहा। 7जँची आवाज में उ बोला, “परमेस्सर स डेराअ अउर ओकर स्तुति करा। काहेकि ओकरे निआव क समइ आइ ग अहइ। ओकर आराधाना करा जे आसमान, धरती, समुदर अउर जल स्रोत क बनाएस।”

8एकरे बाद ओकरे पाछे एक अउर सरगदूत आवा अउर बोला, “ओकर पतन होइ चुका अहइ! महान नगरी बाबुल क पतन होइ चुका अहइ। उ सब जाति क अपने पइदा अनैतिक व्यभिचार स परमेस्सर क गुस्सा क वासना भरी दाखरस पिआएस।”

9उ दूइनउँ क बाद फिन अउर एक सरगदूत आवा अउर जोर स बोला, “जदि केहू जानवर अउर जानवर क मूर्ति क पूजा करत ह अउर अपन होंथे में माथे प ओकर मोहर लगवाए रहत ह। 10अउर उ भी परमेस्सर क गुस्सा क दाखरस पिई। अइसी सुद्ध तीखी दाखरस जउन परमेस्सर क गुस्सा क कटोरिया में बनाई ग अहइ। उ मनई क पवितर सरगदूतन अउर मेमनन क सामने धधकत गंधक में यातना दीन्ह जाई। 11जुग जुग तलक ओनकी यातना स धूँआ उठत हमेसा रही। अउर जउने पे जानवर क नाउँ क छाप छपी रही अउर उ जानवर अउ ओकर अउर ओकरी मूर्ति क पूजा करत रही। ओनका दिन रात कबहुँ चइन न मिली।”

12इ ही क माने है कि परमेस्सर क पवित्तर लोग क धीरज अउर सहनशीलता धरइ क जरूरत अहइ जउन परमेस्सर क हुकुमन अउर ईसू में बिसवास क पालन करत हीं।

13फिन एक आकासबाणी क मई इ कहत सुनेउँ, “एका लिखा: धन्य अहइ उ सबइ मृतक जउन अबसे पभूँ में मरस्थित होइके अहइ।”

आतिमा कहत ह, “हाँ, इ ठीक अहइ। ओनका मेहनत क कारण आराम मिली काहे बरे कि ओनकर काम, ओनके साथे अहइ।”

धरती क फसल क कटनी

14फिन मई देखेउँ कि मोरे समन्वा हुवाँ एक सफेद बादर रहा। अउर उ बादर प एक ठु मनई बइठा रहा जउन मनई क पूत जइसेन दीख पड़त रहा। उ अपने माथे प एक सोने क मुकुट धारण करे रहा अउर ओकरे हाथे में एक तेज हँसिया रही।

15तबहिं मंदिर में स एक ठु अउर सरगदूत बाहेर निकला। उ बदरे प बइठे मनई स जोर क आवाज में कहेस, “हँसिया चलावा अउर फसल एकट्ठी करा, काहे बरे कि फसल काटइ क समइ आइ ग अहइ। धरती क

फसल पक चुकी अहइ।” 16इ बरे जउन बदरे प बइठा रहा, उ धरती प आपन हँसिया हिलाएस अउर धरती क फसल काट लीन्ह गइ।

17फिन सरग क मन्दिर में स एक अउर सरगदूत बाहेर निकला ओकरे लगे भी एक तेज हँसिया रही।

18उहइ समइ प वेदी स एक अउर सरगदूत आवा। उ सरगदूत क आगी पइ अधिकार रहा। उ सरगदूत स जोर क आवाज में कहेस, “अपने जोरदार हँसिया क चलावा अउर धरती क बेल स अंगूर क गुच्छा उतारा ल्या काहे बरे कि एकर अंगूर पक चुका अहइ।” 19इ बरे उ सरगदूत धरती प आपन हँसिया झुलाएस अउर धरती क अंगूर उतारी लिहस अउर ओनका परमेस्सर क भयंकर कोप क विसाल रसकुण्ड में ड़ाइ दिहस। 20अंगूर सहर क बाहेर क धानी में रौंद क निचोड़ लीन्ह गएन। धानी में स खून बहै लाग। खून घोड़ा क लगाम जेतना ऊपर चड़ि गवा अउर लगभग तीन सौ किलोमीटर क दूरी तलक फइल गवा।

आखिरी विनास क सरगदूतन

15 आकास में फिन मई एक अउर महान अचरज भरी निसानी देखेउँ। मई देखेउँ कि सात सरगदूतन अहइँ जउन सात आखिरी महाविनास लिहे भए अहइँ। इ सबइ आखिरी विनास अहीं, काहे बरे कि एकरे साथेन परमेस्सर क गुस्सा खतम होई जाई। 2फिन मोका आग स मिला काँच क समुदर जइसा देखाइ पड़ा। अउर मई देखे कि उ पचे उ जनावर क मूरत प अउर ओनके नाउँ स जुड़ी संख्या प जीत हालिस कइ लिहे अहइँ, ओनहुँ काँच क समुदर प खड़ा अहइँ। उ पचे परमेस्सर क दीन्ह गइ वीणा लिहे रहेन। 3उ पचे परमेस्सर क सेवकन मूसा अउर मेमना क इ गाना गावत रहेन:

“जउन काम तू करत रहत हया उ सबइ महान अहइँ। तोहार काम करइ क ताकत अचरजभरी अउर अनन्त अहइ हे सर्वसक्तिमान पभूँ परमेस्सर तोहार मार्ग धर्म संगत अउर सच्चे अहइँ। तू सब जातिन क राजा अहया,

4हे पभूँ, तोहसे मनई हमेसा डेरात रहिहइँ तोहार नाउँ लइके, मनई स्तुति करिहइँ काहे बरे कि तू अकेले पवितर अहा। तोहरे समन्वा सब रास्ट्रन अहइँ अउर तोहार आराधाना करिहइँ। काहे बरे कि इ बात अउर पता चलि ग अहइ तू जउन करत हया, उहइ, निआव अहइ।”

5एकरे बाद मई देखेउँ कि सरग क मन्दिर मतलब करार क तम्बू क खोला गवा 6अउर उ पचे सातउँ सरगदूतन जेनके लगे आखिरी साथ महामारी रहिन, मन्दिर स बाहर आएन। उ पचे चमकीले साफ मलमल क कपड़ा पहिने रहेन। अपने सीना प सोनेक पटका बाँधे रहेन। 7फिन उ चार प्रनियन में स एक उ सताउँ सरगदूतन क सोना क कटोरा दिहस जउन हमेसा हमेसा क बरे अमर परमेस्सर क गुस्सा स भरा रहेन। 8उ मन्दिर परमेस्सर क महिमा अउर ओकरे सक्ति क धुँअन स भरा रहा जइसे कि जब तलक ओन सात सरगदूतन क सात महामारी पूरा न होइ जाई, तब तलक मन्दिर में कउनउँ धुसइ न पावइ।

परमेस्वर क गुस्सा क कटोरा

16 फिन मई सुनेउँ कि मन्दिर में स एक जोर क आवाज़ ओन सात सरगदूतन स कहत अहइ, “जा अउर परमेस्वर क गुस्सा क सातउँ कटोरन क धरती प उड़ेर द्या।”

2इ बरे पहिला सरगदूतन गवा अउर उ धरती प आपन कटोरा उड़ेर दिहेस। एकइ नतीजा इ भवा कि उ मनई जेनके ऊपर जनावर क निसानी छपी रही अउर जउन ओकरी मूर्ती क पूजा करत रहेन, क ऊपर भयानक पीड़ा पइदा करइवाले छाला फूट आपन।

3एकरे बाद दूसर सरगदूतन आपन कटोरा समुदर में उड़ेर दिहेस अउर समुदर क पानी मरे भए मनई क खून में बदल गवा अउर समुदर में रहइवाले सब जीवजन्तु मरि गएन।

4फिन तीसरा सरगदूतन नदियन अउर पानी क झरनन पइ आपन कटोरा उड़ेर दिहेस अउर उ खून में बदल गएन। 5उहइ समइ प मई पानी सरगदूतन क इ कहत सुनेउँ:

“तू ही अहा उ, जउन पुव्यातिमा! जउन अहइ, जउन रहा सदा-सदा स तू ही अहा जउन अहइ एक ही पवितर, करत भए निआव ओनकर,

6ओन सबन पवितर लोगन अउर नबियन क खून बहाए अहइ। तू ओनका पिअइ क बरे केवल खून दिह्या। काहे बरे कि ओन इहइ क काबिल रहेन।”

7फिन मई वेदी स आवत आवाज़ सुनेउँ:

“हाँ, सर्वसक्तिमान पभू परमेस्वर, तोहार निआव सच्चा अउर उचित अहइ।”

8फिन चौथा सरगदूत आपन कटोरा सूरज क ऊपर उड़ेर दिहेस। इ तहर ओका मनइयन क आग स जलावइ क ताकत दइ दीन्ह गइ। 9अउर मनई भयानक गरमी स झुलसइ लागेन। उ परमेस्वर क नाउँ क कोसइ लागेन काहे बरे कि इन जेका महामारी प क अधिकार अहइ। मुला उ पचे आपन मनफिरावा नाहीं किहेन अउर न जिन्नगी क बदलेन अउर परमेस्वर क महिमा किहेन। 10एकरे बाद पाँचवा सरगदूत आपन कटोरा उ जनावर क सिंहासन प उड़ेर दिहेस अउर ओकर राज अँधेरे में डूब गवा। सब मनई तकलीफ क आपन जीभ काट लिहेन। 11आपन आपन पीड़ा अउर छालन क कारण उ सरग क परमेस्वर क निन्दा तउ करइ लागेन मुला आपन मनफिरावा नाहीं किहेन।

12फिन छठवाँ सरगदूत आपन कटोरा फरात नाउँ क महानदी प उड़ेर दिहेस अउर ओकर पानी सूख गवा। एहसे पूरब दिसा क राजन क बरे रास्ता तइयार होइ गवा। 13फिन मई देखेउँ कि उ भयंकर अजगर क मुँह स, उ जनावर क मुँह स, अउर कपटी नबियन क मुँहसे तीन दुस्ट आतिमन निकलिन, जउन मेड़क क तरह दिखाई पड़त रहिन। 14इ सब दुस्ट क आतिमन रहिन अउर ओनके में अद्भुत कारजन करइ क ताकत रही। उ पूरी दुनिया क राजा लोगन में सबसे सर्वसक्तिमान परमेस्वर क महान दिन, जुद्ध करइ क बरे एकट्ठा करइ क निकल पड़ेन।

15“सावधान! मई: चोर क समान आवत हउँ। उ धन्य अहइ जउन जागत रहत ह अउर अपने क परन क अपने

साथे रखत ह जइसेन कि उ नंगा न घूमइ अउर मनई ओका लज्जित होत न देई।”

16इ तरह स उ दुस्ट आतिमन ओन राजन क एकट्ठा कइके उ जगह प लइ आएन जउने क इब्रानी भाखा में हर मगिदोन कहा जात ह।

17एकरे बाद सातवाँ सरगदूत आपन कटोरा हवा में उड़ेर दिहेस! अउर सिंहासन स पइदा भवा एक भयंकर आवाज़ मन्दिर में स कहत निकरी, “इ खतम होइ गवा!” 18तबहिं बिजली कउँधइ लाग, आवाज़ क अउर गरजन अउर एक ठू जर्बदस्त भूचाल आइ गवा। मनई क धरती प परगट होइ क बाद क इ सबसे भयानक भूचाल रहा। 19उ बड़ा सहर तीन टुकड़न में बिखर गवा, अउर अधर्मियन क रास्ट्रन नगरन क नस्ट होइ गए। परमेस्वर महानगरी बाबुल क दण्ड देइ क बरे याद करे रहा। आपन भयंकर प्रकोप क काटोरा में स ओका दइ दिहेस। 20सब द्वीप गायब होइ गएन। कउनो पहाड़ तक क पता नाहीं चल पावत रहा। 21पचास पचास किलो क ओला, आसमान स मनइयन क ऊपर बरसइ लागेन। ओलन क भयंकर विपत्ति क कारण सब मनई परमेस्वर क कोसत रहेन, काहे बरे कि इ भयानक आफत रही।

जनावर प बइठी स्त्री

17 एकरे बाद ओन सात सरगदूतन, जउने क लगे कटोरा रहेन, ओहमाँ स एक तु मोरे लगे आवा अउर बोलेस, “आवा, मई तोहका तमाम नदियन क किनारे बइठी उ महान वेस्या क दीन्ह जाइवाला दण्ड देखाई। 2धरती क राजा ओकरे साथ सम्बंध बनाएन। अउर जउन मनई धरती प रहत हीं, उ पचे ओकरी विलास मदिरा स मतवाला होइ गएन।”

3फिन मई आतिमा क कहे क मान कीन्ह अउर उ सरगदूत मोका बीहड़ जंगल में लइ गवा जहाँ मई एक स्त्री क लाल रंग क एक अइसे जानवर प बइठा देखेउँ जउने प परमेस्वर क बरे गारी लिखी गइ रही। ओकरे सात मुँड़ रहेन अउर दस सींग रहेन। 4उ स्त्री बइजनी अउर लाल रंग क कपरा पहिने रही। उ सोने, बेसकीमती रत्नन अउर मोतिअन स सजी रही। उ अपेन हाथ में सोने क एक कटोरा लिहे रही जउन बुरी बातन अउर वेस्यापन क बुराई स भरा रहा। 5ओकरे माथे प एक निसानी रही जेहकर गुप्त अरथ अहइ:

महान बाबुल क सबइ महतारी वेस्या अउर धरती प होइवाली सब बुराईयन क पइदा करइवाली।

6मई देखेउँ कि उ स्त्री परमेस्वर क पवितर लोगन क खून पिए रही जउन ईसू क बरे अपने बिस्सास क साच्छी क बरे आपन प्राण छोड़ दिहेन।

ओका देखके मई बड़े अचरज में पड़ गएउँ। 7तबइ उ सरगदूतन मोसे पूछेस, “तू अचरज में काहे पड़ा अहा? मई तोहका इ स्त्री क अउर जउने जनावर प उ बइठी अहइ, ओकरे प्रतीक क समझावत अहउँ। सात सिर अउर दस

सींगवाला इ जनावर 8जउन तू देखे अहा, पहिले कबहूँ जिन्दा रहा, मुला अब जिन्दा नाहीं अहइ। फिन उ पताल स अबहीं निकरइवाला अहइ। अउर तबहिँ ओकर बिनास होइ जाई। फिन धरती क उ मनई जउने क नाउँ दुनिया क सुरुआतइ स जीवन क पुस्तक मँ नाहीं लिखा ग अहइ, उ जानवर क देखके चकित होइहीं काहे बरे कि उ जिन्दा रहा, मुला अउर जिन्दा नाहीं अहइ, मुला फिन उ आवइवाला अहइ।

9“इहइ उ जगह आटइ जहाँ बुद्धिमान मनइयन क बुद्धि क जरूरत अहइ। इ सात सिर, उ सात पर्वत अहीं जउने प उ स्त्री बइठी अहइ। उ सात सिर, उ सात राजन क प्रतीक अहइ। 10जउने मँ स पहिले पाँच क पतन होइ चुका अहइ, एक तु अबे राज करत अहइ अउर दूसर अब तक आइ नाहीं बा। मुला जब उ आई तब उ बहुत कम समइ तलक रूकी। 11उ जनावरन जउन पहिले कबहूँ जिन्दा रहा, मुला अउर जिन्दा नाहीं अहइ, खुदइ अठवाँ राजा अहइ जउन ओन सातउ मँ स एक अहइ, ओकइ बिनास होइवाला अहइ। 12“जउन दस सींग तू देखे अहा, उ दस राजा अहीं, उ पचे अबहिँ तलक आपन सासन सुरु नाहीं कर अहइँ मुला जनावर क साथे एक घण्टा क बरे ओनका सासन करइ क अधिकार दीन्ह जाई। 13इ दसउ राजन क एककइ उद्देश्य रहा कि उ आपन ताकत अउर आपन अधिकार उ जनावर क दइ देई। 14उ मेमना क खिलाफ लड़ाई लड़िहईँ मुला मेमना अपने बोलाए, अपने स चुने अउर अपने बिस्सासियन क साथ मिलके ओनका हराइ देई। काहे बरे कि उ अउर प्रभूअन क पभू अउर राजा लोगन क राजा अहइ!”

15उ सरगदूत मोसे फिन कहेस, “उ सबइ नदियन जउने क तू देखे रह्या, जहाँ उ वेस्या बइठी रही, तमाम खानदानन, समुदायन, जातियन अउर भाखन क प्रतीक अहइ। 16उ दस सींग जउने क तू देख्या, अउर उ जनावर उ वेस्या स नफरत करिहईँ अउर ओकर सब चीज छीनके ओका नंगी छोड़ देईहईँ। उ ओकर सरिर क खाइ जइहईँ अउर ओका आगी मँ जलाइ देइहईँ। 17आपन प्रयोजन पूरा करइ क बरे परमेस्सर ओनके सबनके एक राय कइके, ओनके मन मँ इ बइठाइ दिहे अहइ, जइसे कि जब तक परमेस्सर क बचन पूरा न होइ जाइ, तब तक सासन करइ क आपन अधिकार उ जनावर क सौंप देई। 18उ स्त्री जउने क तू देखे रह्या उ महानगरी रही, जउन धरती क राजन प सासन करत ह।”

बेबीलोन क नास

18 एकरे बाद मई एक अउर सरगदूत क अकास स बड़ा भव्यता स नीचे उतरत देखेउँ। ओकरी महिमा स समूची धरती चमकइ लाग। 2जउने जोरदार आवाज़ स पुकारत उ बोला:

“मिट गइ! बेबीलोन महानगरी मिट गइ! उ दुस्ट आतिमन क रहस्य क घर बन गइ रही, उ असुद्ध मनइयन क आत्मा क बसेरा बन गइ रही, अउर नफरत करइ

लायक चिड़ियन क घर बन गइ रही। उ तमाम गन्दा, निन्दा करइ लायक जनावरन क बसेरा बन गइ रही।

3काहेकि उ सबको व्यभिचार क क्रोध क मदिरा पिआए रही। जउने इ दुनिया क राजा क खुदइ जगाए रही, ओकरे साथे व्यभिचार करे रहेन सासक लोग अउर ओनके भोगइ स इ दुनिया क धनी व्यापारी बना रहे।”

4अकास स मई एक अउर अवाज़ सुनेउँ जउन कहत रही:

“अरे मोर मनइयन! तू उ सहर स बाहर निकर जा, ओनके पापन्ह क कतहूँ तू गवाहन न बनब्या, कतहूँ अइसा न होइ, कि जउन ओके नास रहेन, तोहरेन ऊपर न गिर जाई।

5काहे बरे कि ओकरे पाप क गठरी आसमान तक ऊँची अहइ। परमेस्सर ओकरे बुरा काम क याद करत अहइ।

6अरे! जइसेन कि उ तोहरे साथे करे रहा, वइसेन तू भी ओनके साथ करा उ तोहरे साथे जइसेन करे रहा, तू ओकर दुगना ओकरे साथे करा, दूसरे क बरे उ तोहका जउने कटोरा मँ तीत दाखरस पिआए रह्या, तू ओका ओसे दुगुना तीत दाखरस पिआवा।

7काहे बरे कि उ खुदइ क जउन महिमा अउर वैभव दिहेस, तू ओका यातना कहर अउर पीड़ा द्या। काहे बरे कि उ खुदइ स कहति रही ह, ‘मई खुदइ राजा क आसन प बइठी महारानी अहउँ, मई विधवा न करबइ, इ बरे सोक न करा।’

8इही बरे जउन नास होइ क तय होइ ग अहइ, उ एक ही दिन मँ ओका घेर लेइहीं। महामृत्यु, महारोदन अउ दुर्भिच्छ भीसण अउर कइ देइहीं ओनका जलाय क राख, काहे बरे कि परमेस्सर पभू बहोत ताकतवर अहइ, अउर ओनही ओकर निआव करत अहईँ।”

9जउन धरती क राजा जउन ओकरे साथ यौन-पाप करे रहेन अउर ओकरे भोग विलास मँ हिस्सा बटाए रहेन, ओकरे जल जाइ क धुँआ जउ देखिइहीं तउ ओकरे बरे रोइहीं अउ चिल्लाइहीं। 10उ पचे ओकरे कस्ट स डेराइके हुवाँ स बहोत दूर खड़ा रहिहईँ:

“ओ! ताकतवर नगर बेबीलोन! भयावह अउर भयानक हाय! तोहार दण्ड तोहका तनिक देर मँ मिल गवा।”

11इ धरती क व्यापारी ओकरे कानन रोइहीं अउ चिल्लाइहईँ काहे बरे कि ओनके कउनो चीज केउ अउर मोल न लेई, 12न तउ केहू कउनो चीज लेइ-सोने क, चाँदी क, बेसक्रीमती रत्न, मोती, मलमल, बैजनी, रसमी अउर किरमिजी कपरा हर तरह क महकउआ लकड़ी, हाथी क दाँत क बनी तमाम चीज, अनमोल लकड़ी, काँसा, लोहा अउर संगमरमर सी बनी तमाम चीज,

13दारचीनी, गुलमँहदी, महकोरा, धूप, रसगन्धक, लोहबान, दाखरस, जइतून क तेल, मइदा, गोहूँ मवेसी, भेड़ी, घोड़ा अउर रथ, दास अउर मनई क सरिर अउर आतिमा क व्यापारिन कहिहीं:

14“अरे बेबीलोन! उ सब चीजन अच्छी स अच्छी, जउने में तोहार दिल रम ग रहा, तोहका छोड़के सब चली गइ अहइ। तोहार बहुमूल्य अउर बहुमूल्य वस्तुअन तोहरे हाथ स चली गइन ह।”

15उ व्यौपारी जउन एकइ सबकइ व्यौपार करत रहेन अउर एहसे धनी बन ग रहेन, उ दूर खड़ा रहिहई काहे बरे कि उ कस्ट स डेराइ ग अहइ। उ रोअत चिल्लात 16कहिहई:

“केतना डरावना अहइ अउर केतना भयानक अहइ, महानगरी इ उहीं क बरे हहइ। जउन नीक नीक मलमली कपड़ा पहनत रही, जउने रंग बैजनी अउर किरमिजी रहा! अउर जउन सोने स सजत रही, बेसकीमती रत्नन स, सजी मोतियन स 17अउर इ सारी सम्पत्ति तनिक देर में मित गइ।”

फिन जहाज क हर कप्तान या हर उ मनई जउन जहाज स चाहे जहाँ कहीं जाइ सकत ह अउर सबइ मनई जउन समुद्र स आपन जीविका चलावन हीं, उ नगरी स दूर खड़ा रहेन।

18अउर जउ उ पचे ओकरे जरे स उठत धुँआ क उठत भए देखेन तउ जोर स चिल्लाइ उठेन, “इ बड़ी नगरी क तरह अउर कउन नगरी अहइ?”

19फिन उ पचे आपने मूँडे प धूल ड़ावत जोर स चिल्लानेन, अउर कहेन:

“महानगरी! हाय, इ केरेंनी भयानक अहइ! उ रोअत अउर सोक मनावत भए कहेन: हाय, हाय! महान नगरी जेकरे सम्पत्ति स सब जहाजवाले धनवान होइ गए रहेन! अब घण्टा भर ही में उजर गई।

20हे सरग, प्रेरितन! अउर नबियन! ओकरे बरे खुसी मनावा, परमेस्सर क लोगन खुसी मनावा! काहेकि परमेस्सर ओका उहइ तरह दण्ड दइ दिहेन जइसेन दण्ड उ तोहका दिहे रहा।”

21फिन एक ताकतवर सरगदूत चक्की क पाट जइसी एक जबर क चट्टान उठायेस अउर ओका समुद्र में फेंकत कहेस,

“महानगरी! अरी बेबीलोन महानगरी! तोहका क इहइ गति स बलपूर्वक फेंक दीन्ह जाई, अउर तू नस्ट होइ जाबू, फिन स मिलन पउबू।

22अउर तुझमों बीणा बादकन, संगीतगन बाँसुरी बजावइवालन अउर तुरही फूँकइवालन क स्वर फिन कबहुँ सुनाई पड़ी, न कउनो कला सिल्पी तोहरे में पावा जाई न तोहमों न कउनो चक्की क आवाज़ सुनाइ देई।

23अउर कबहुँ फिन दिया क ज्योति न चमकी, अउर न तउ कबहुँ फिन दुल्हा दुलहिन क मीठी आवाज़ गूँजी। तोहरे न व्यपारी जे दुनिया महान लोगन में स रहेन तोहार जादूगरी जाति भरमाई गइन रहीं।

24इ नगरी में नबियन क खून बहावा पावा ग रहा, अउर परमेस्सर क पवित्र मनइयन क लहू बहावा ग रहा, अउर उ सबहिं जेका इ धरती प बलि चड़ाइ दीन्ह ग रही।”

सरग में परमेस्सर क स्तुति

19 एकरे बाद मई सरग क भीड़ स उच्च स्वर में आवाज़ आवत सुने रह्यो:

“हलिल्लूय्याह! परमेस्सर क जय होइ! जय होइ! महिमा अउर समर्थ हमेसा मिलइ!”

2ओकर निआव सच्चे अउर धर्ममय अहइ। उ बड़ी वेस्या क उ निआव करेस, जउन आपन व्यभिचार स इ धरती क भ्रस्ट कइ दिहे रही, अपने दासन क मउत क बदला लइ लिहेस।”

3ओन्ह फिन कहेन्ह:

“हलिल्लूय्याह! ओसे धुआँ जुग जुग तक उतरत रहा।”

4फिन चौबीसउँ बुजुर्गन अउर चारउ प्राणिअन सिंहासन प बइठा परमेस्सर क झुकके प्रणाम करेन अउर ओकर आराधना करत गावइ लागेन:

“आमीन, हलिल्लूय्याह!”

5सिंहासन स फिन आवाज़ आइ जउन कहत रही:

“ओ ओकर सेवकन! तू सबे हमरे परमेस्सर क स्तुति करा, अउर अपने सब लोगन क चाहे बड़ा होइ या छोटा सबइ क इज्जत करत रहा!”

6फिन मानो मई एक विसाल जनसमूहे क आवाज़ सुनेउँ जउन कि भयंकर पानी क बहाव अउर बदरन क जोरदार गरजइ-तरजइ क आवाज़ जइसे रही। कहत रही:

“हलिल्लूय्याह! जय होइ ओकर, काहे बरे कि हमार पभू परमेस्सर, सर्वसक्ति स पूरा होइके राज्य क ताकतवर बनावत अहइ।

7इ बरे आवा, आनन्द खुसी मनावा। आवा, ओका महिमा देइ। काहे बरे कि अउर मेमना क बियाह क समइ आइ गवा अहइ। ओकर दुलहिन सजी धजी तइयार होइ गइ।

8ओका आग्या मिली अहइ, साफ सफेद निर्मल मलमल पहन ल्या।”

(इ मलमल परमेस्सर क पवित्र लोगन बड़िया कामन क प्रतीक अहइ।)

9फिन उ मोसे कहइ लाग, “लिखा, उ धन्य अहइ जेनका इ बियाह क भोजन में बोलावा ग अहइ।” उ मोसे फिन कहिस, “इ परमेस्सर क सच्चा वचन अहीं।”

10अउर मई ओकर आराधना करइ क बरे ओकरे पाँव प गिर पड़ेउँ। मुला उ मोसे कहेस, “सावधान! अइसा न करा। मई तउ तोहरे अउर तोहरे भाइयन क साथी परमेस्सर क साथी सेवक अहउँ जउने पइ ईसू क साच्छी क भविस्सबाणी की आतिमा अहइ। अउर प्रचार क जिम्मेदारी अहइ। परमेस्सर क आराधना करा, कहे बरे कि ईसू क प्रमाणित संदेस इ बात क साच्छी अहइ कि ओहमों एक नबी क आतिमा अहइ।”

सफेद घोड़ा क सवार

11फिन मई सरग क खुलत देखेउँ अउर हुवाँ मोरे समन्वा एक सफेद घोड़ा रहा। घोड़े प जउन बइठा रहा। ओका बिस्सासनीय अउर सत्य कहा जात रहा काहे बरे कि उ निआव धार्मिकता स निर्णय करत ह। 12ओकर आँखी अइसी रहीं जइसे आगी क लपट होई। ओकरे मूँड़े पइ बहोत स मुकुट रहेन। ओकरे ऊपर एक नाउँ लिखा रहा, जेका ओकरे अलावा अउर केहू नाहीं जानत। 13उ अइसा कपड़ा पहिने रहा जउने क खून मँ डुबोवा ग रहा। ओका नाउँ दीन्ह रहा, “परमेस्सर क वचन।” 14सफेद घोड़न प बइठी सरग क सेना ओकरे पीछे-पीछे चलत रहिन। उ साफ सफेद मलमल क कपरा पहिने रहा। 15रास्ट्रन क मारइ क बरे ओकरे मुँहे स एक तेज धार क तरवार बाहेर निकरत रही। उ ओकरे ऊपर लोहे क दण्ड स सासन करी। अउर सर्वसक्तिमान पर्भू परमेस्सर क भयानक गुस्सा क धानी मँ अंगूर क रस निचोड़ी। 16ओकरे वस्त्र अउर जाँघ पइ इ नाउँ लिखा रहा।

राजन क राजा, अउर पर्भूअन क पर्भू

17एकरे बाद मई देखेउँ कि सूरज क ऊपर एक सरगदूत खड़ा अहइ। उ ऊँचे अकास मँ उड़इवाली सबहिं चिड़ियन स जोर क आवाज स कहेस, “आवा, परमेस्सर क महाभोज क बरे एकट्ठा होइ जा। 18जइसे कि तू सासकन, सेनापतियन, मजदूर आदमियन, घोड़न अउर ओनके सवारन क मांस खाइ सका। अउर सब मनई छोट-बड़ा आदमियन अउर खास आदमियन क सरीर खाइ सका।”

19फिन मई उ जनावरन क अउर धरती क राजन क देखेउँ ओनके संग ओनकइ सेना रही। उ पचे उ एक घोड़ा क सवार अउर ओकरी सेना स जुव्ध करइ एक साथे आइके जुट गएन। 20उ जनावर क पकड़ा गवा। ओकरे साथ उ झूठा नबी भी रहा जउन जानवर क उपस्थिति मँ अद्भुत कारजन देखावा करत रहा अउर ओनका ठगत रहा जउने प उ जनावरन क छाप लगी रही अउर जउन ओकरी मूर्ति क आराधना करत रहेन। उ जनावरन क अउर झूठे नबी, दुइनउँ क जलत गंधक क भभक्त झील मँ जिन्दइ डाल दीन्ह गवा। 21घोड़ा क सवार क मुँह स जउन तरवार निकरत रही, बाकी क सैनिक ओसे मार ड़ावा गएन। फिन चिड़ियन मिलके ओकरे माँस खाइके अघाइ गइन।

हजार साल

20 फिन आकास स मई एक सरगदूत क नीचे उतरत देखेउँ। ओकरे हाथ मँ पाताल क चाभी अउर एक बड़ी संकरी रही। 2उ पुरान महासांप क पकड़ लिहिस जउन कि दैत्य यानी सइतान बाटइ फिन ओका एक हजार साल क बरे संकरी मँ बाँध दिहिस। 3तउ उ सरगदूत ओका अथाह कुंड मँ ड़ाइके बन्द कइके परदार सौंप प मुहर लगाइ दिहिस जेहसे जब तलक हजार साल पूरा न होइ जाइ, उ कउनो मनई क धोखा न दइ सकत। हजार साल पूरा होइ

जाइ क पाछे ओका कछू समइ क बरे छोड़ा जाइ क अहइ।

4फिन मई कछू सिंहासन देखीउँ जउने प कछू मनई बइठा रहेन। ओनका निआव करइ क अधिकार दीन्ह ग रहा। अउर मई ओनकी आतिमा क देखेउँ जेनके सिर, उ सच्चाई क कारण, जउन ईसू स प्रमाणित अहइ, अउर परमेस्सर क संदेस स, काट दीन्ह ग रहेन, जे उ जनावरन या ओकरी मूर्ति क कबहुँ पूजा नाहीं करे रहेन। जे अपने माथे प या अपने हाथे प ओकर निसानी कबहुँ धारण नाहीं किहे रहेन। उ पचे फिन स जिन्दा होइ गएन अउर उ मसीह क साथ एक हजार साल तक राज करेन। 5(बाकी मनई हजार साल पूरा होइ गए प फिन स जिन्दा नाहीं भएन।) इ पहिला पुनरुत्थान बाटइ। 6उ धन्य अहइ अउर पवितर अहइ, जउन पहले पुनरुत्थान मँ भाग लेत अहइ। एन पइ दूसरी मृत्यु क कउनो अधिकार नाहीं अहइ। इ आदमियन प दूसर मउत क कउनो अधिकार नाहीं मिला अहइ। पर उ पचे तउ परमेस्सर अउर मसीह क आपन याजकन होइहीं अउर ओकरे साथे एक हजार साल तक राज करिहीं।

7फिन एक हजार साल पूरा होइ जाए प सइतान क ओकरी जेल स छोड़ दीन्ह जाई। 8अउर उ समूची धरती प फइली रास्ट्रन क छलइ क बरे निकर पड़ी। उ गोग अउर मागोग क छली। उ ओनका लड़ाई क बरे एकट्ठा करी। उ ओतनइ अनगिनत होइहीं जेतना कि समुदर क तट क रेतकण अहइ।

9सइतान क सेना समूची धरती प फइल जाई अउर उ परमेस्सर क लोगन क छावनी अउर ओनकर प्यारी नगरी क घेर लेई। मुला आग जउन सरगे स उतरी अउर ओनका निगल जाई, 10एकरे पाछे सइतान क जउन ओनका धोखा देत रहा ह, भभक्त गंधक क झील मँ फेंक दीन्ह जाई जहाँ उ जनावरन अउर झूठा नबी दुइनउँ ड़ाला ग अहइ। ओनका हमेसा हमेसा क बरे रात-दिन तड़पावा जाई।

दुनिया क मनइयन क निआव

11फिन मई एक जबरदस्त सफेद सिंहासन कइँती ओह प विराजमान जे रहा, ओका देखेउँ। ओकरे सामने स धरती अउर आकास भाग खड़ा भएन। ओनका पता नाहीं चल पावा। 12फिन मई छोट अउर बड़ा मृतक मनइयन क देखेउँ। उ पचे सिंहासन क आगे खड़ा रहेन। कछू किताब खोली गइन। फिन एक अउर किताब खोली गई। उ रही जीवन क किताब अउर ओन किताबन मँ लिखी गई बातन क आधार प मृतकन क न्याय ओनके कामन क अनुसार कीन्ह गवा। 13जउन मृतक मनइयन समुदर मँ रहेन, ओनका समुदर दइ दिहिस, अउ मृत्युलोक अउ अधोलोक आपन आपन मृतक मनइयन क सौंप दिहेन। हर एक क निआव ओनके कर्मन क अनुसार कीन्ह गवा। 14एकरे बाद मउत क अउर अधोलोक क आग क झील मँ झोंक दीन्ह गवा। इ आग क झील दूसरी मउत बाटइ। 15जउन कउनो मनई क नाउँ जीवन क पोथी मँ न मिली तउ उहू क आग क झील मँ ढकेल दीन्ह गवा।

नवा यरूसलेम

21 फिन मई एक नवा सरग अउर नवा धरती देखेउँ। काहे बरे पहिला सरग अउर पहली धरती खतम होइ ग रहेन। अउर कब क समुदर उ नाही रहा। **2**मई यरूसलेम क उ पवितर नगरी नवा यरूसलेम क आकास क बाहर निकरिके परमेस्सर कईती स नीचे उतरत देखेउँ। उ नगरी क अइसे सजावा ग रहा जइसे कउनो दुलहिन क ओकरे पति स मिलइ क बर सजावा ग होइ। **3**तबइ मई आकास में एक जोरदार आवाज़ सुनेउँ। उ कहत रही, “देखा अउर परमेस्सर क मन्दिर आदमियन क बीच में अहइ अउर उ ओनही क बीच में रही। उ पचे ओकर लोग रइहीं अउर परमेस्सर ओनकइ परमेस्सर होइहीं। अउ खुदइ परमेस्सर ओनकइ परमेस्सर होइहीं। **4**ओनकी आँख क एक-एक आँसू उ पोंछ ड़ाई। अउर हुवाँ अउर न तउ कबहुँ मउत होई न सोक इ बजह स केहू क रोवइ धोवइ क न पड़ी। काहे बरे कि उ सब पुरानी बात अब खतम होइ चुकी बाटिना।”

5एकरे ऊपर जउन सिंहासन प बइठा रहा, उ बोला, “देखा मई सब कछू नवा कइ देत अहउँ।” उ फिन कहेस, “एका लिख ल्या काहे बरे कि इ वचन विस्सास लायक अहइ अउर इ सच्चा अहइ।”

6फिन उ मोसे बोला, “सब कछू पूरा होइ चुका अहइ। मई अलफा अहउँ अउर मई ओमेगा अहउँ। मई आदि अहउँ अउर मई अन्त अहउँ। जउन मनई जे पिआसा अहइ, मई ओका जीवन-जल क झरना स संत-मेत में खुले मन स जल पिआउब। **7**जउन विजयी होई, उ सब चीज क मालिक बनी। मई ओकर परमेस्सर होब अउर मोरे पूत होई, **8**मुला कायसन, अबिस्सासियन, मूरखन, हत्यासन, व्यभिचारियन, जाद-टोना करइवालेन, मूर्ति क पूजा करइवालेन अउर झूठ बोलइवालेन क भभकत गंधक क जलत झील में आपन हिस्सा बँटावइ क होई। इ दूसरी मउत बाटइ।”

9फिन उ सात सरगदूतन में स एक, जेनके लगे सात आखिरी विनास क कटोरा रहेन, एक ठु आगे आवा अउर मोसे बोला, “हिआँ आवा! मई तोहका उ दुलहिन देखाइ देइ जउन मेमना क दुलहिन अहइ।” **10**अबहीं मई आतिमा क आवेस में रहे कि उ मोका एक बिसाल अउर ऊँचे पर्वत प लइ गवा। फिन उ मोका यरूसलेम क पवितर नगरी क दर्सन कराएस। उ परमेस्सर क तरफ स आकास स नीचे उतरत रहीं। **11**उ परमेस्सर क महिमा स चमकत रही। उ बिल्कुल निर्मल यसब नामक महामूल्यावान रत्नन तरह चमकत रही। **12**नगरी क चारिहुँ कईती एक बड़ा क ऊँचा परकोटा रहा जेहमों बाहर दरवाजा रहेन। उ बारहउँ दरवाजन प बारह सरगदूत रहेन। अउर बारहउँ दरवाजा प इस्त्राएल क बारह कुलन क नाउँ छपा रहेन। **13**एहमों स तीन दरवाजन पूरब क तरफ रहेन, तीन दरवाजन उत्तर कईती तीन दरवाजन दक्खिन कईती अउर तीन दरवाजन पच्छिम कईती रहेन। **14**नगर क परकोटा बारह नीव प बनावा ग रहा अउर ओनके ऊपर मेमना क बारह प्रेरितन क नाउँ छपा रहेन।

15जउन सरगदूत मोसे बतियात रहा, ओकरे लगे सोना क बनी नापइ क एक छड़ी रही जउने स उ नगर क फाटक अउर परकोटा क नाप सकत रहा। **16**नगर क वर्गाकार

बसावा ग रहा। इ जेतना लम्बा रहा, ओतना चौड़ाई रहा। उ सरगदूत उहइ छड़ी स नगर क नापेस। ओकर लम्बाई करीब बारह हजार स्टोडिया पाई गइ। ओकर लम्बाई, चौड़ाई अउर ऊँचाई एकई तरह रही। **17**सरगदूत फिन ओकरे परकोटा क नापेस। उ करीब 144हाथ रहा। ओका मनई क हाथन क लम्बाई स नापा ग रहा जउन हाथ सरगदूतन क हाथ अहइ। **18**नगर क परकोटा यसब नाउँ क रत्नन क बना रहा अउर नगर क काँच क तरह चमकत सुद्ध सोना स बनावा ग रहा। **19**नगर क परकोटे क नीव हर तरह क बेसकीमती रत्नन स सुसज्जित रहिन। नीव क पहला पाथर यसाब क बना रहा, दूसरा नीलम स, तीसरा स्फटिक स, चउथा पन्ना स, **20**पाँचवा गोमेद स छठा मानक स सातवाँ मणि स, आठवाँ पेरोज स, नवाँ पुखराज स, दसवाँ लहसनिया स, ग्यारहवाँ धूम्रकान्त स अउर बारहवाँ चन्द्रकान्ता मणि स बना रही। **21**बारहउँ दरवाजा, बारह मोतियन स बना रहेन, हर दरवाजा एक एक मोती स बना रहेन। नगर क गलियन साफ काँच जइसे सुद्ध सोने स बनी रहिन।

22नगर में मई कउनो मन्दिर नाही देखाई पड़ा। काहे बरे कि सबसे सर्वसक्तिमान पभू परमेस्सर अउर मेमना ओकर मन्दिर में रहेन। **23**उ नगर क कउनो सूरज या चाँद क जरूरत नाही रही जउन ओका रोसनी देइ काहे बरे कि उ परमेस्सर क महिमा स खुदइ प्रकासित रहा। अउर मेमना उ नगर क दिया बाटइ। **24**सब जातियन क मनई इहइ दीपक क रोसनी क सहारे आगे बड़िहई। अउर इ धरती क राजा आपन सुन्दरता इ नगर में लइ अइहीं। **25**दिन क समइ एकर दरवाजा कबहुँ बन्द न होइहीं अउ हुवाँ रात तउ कबहुँ होइ न करी। **26**जातियन क वैभव अउर धन सम्पत्ति क उ नगर में लिआवा जाई। **27**कउनो गन्दी चीज ओहमों घुसइ न पाई। अउर न तउ लज्जा भरा काम करइवालेन अउर झूठ बोलइवालेन ओहमों घुसइ न पाइहीं। ओहमों ओनहीं मनई घुसइ पाइहीं जउने क नाउँ मेमना जीवन क पुस्तक में लिखा अहइ।

22 एकरे बरे उ सरगदूतन मोका जीवन देइवाली पानी क एक नदी देखाएस। उ नदी स्फटिक क तरह चमकत रही उ परमेस्सर अउर मेमना क सिंहासन क निकरत भइ **2**नगर क गलियन स होत भइ बहत रही। नदी क दुइनउँ किनारे प जीवन पेड़ उगा रहेन। ओनके ऊपर हर साल बारह बार फल लगत रहेन। एकरे हर एक पेड़ प हर महीना एक फसल लगत रही अउर इ पेड़न क पत्तियाँ तमाम रास्टन क रोग दूर करइ क बरे रहिन। **3**हुवाँ कउनो तरह क कउनो स्नाप नाही होई। इस नगर में परमेस्सर अउर मेमना क सिंहासन हुवाँ बना रही। अउर ओकर नउकर ओनकइ आराधना करिहई। **4**अउर ओकर मुख देखिहीं अउर नाउँ ओकरे माथे प होइ। **5**हुवाँ कबहुँ रात न होइ। अउर न तउ सूरज अथवा दीपक क रोसनी क कउनो जरूरत पड़ी। काहे बरे कि ओनके ऊपर पभू परमेस्सर आपन रोसनी उ इइहई अउर उ हमेसा सासन करिहीं।

6फिन सरगदूत मोसे कहेस, “इ वचन क बिस्सास करइ लायक अउर सच्चा अहइ। नबियन क, आतिमा क,

परमेस्सर पभूँ परमेस्सर क सेवकन क, जउन कछू जल्दी घटइवाला अहइ, ओका जतावइ क बरे आपन सरगदूत भेजे अहइ।”

7“सुना! मईँ जल्दी आवइवाला अहउँ। उ पचे धन्य अहईँ जउन इ किताब मँ दीन्ह उ बचनन क पालन करत हीं जउन भविस्सबाणी अही।”

8मईँ यूहन्ना अहउँ। मईँ इ बात सुनेउँ अउर देखे अहउँ। जब मईँ इ बात देखेउँ सुनेउँ तब उ सरगदूत क चरनन मँ गिर क मईँ ओकर आराधना कीन्ह जउन मोका इ बात देखावत रहा। 9उ मोसे कहेस, “सावधान, तू अइसा न करा! काहे बरे कि मईँ तउ तोहार, तोहार भाई नबियन क उन लोगन जउन इ किताब मँ लिखा बचनन क पालन करत हीं, एक साथी नउकर अहउँ। बस परमेस्सर क आराधना करा।” 10उ मोसे फिन कहेस, “इ किताब मँ जउन भविस्सबाणी दीन्ह गइ अहईँ, ओनका छिपाय क न रखा, काहे बरे कि इ बातन क घटित होइ क समइ करीबइ अहइ। 11जउन बुरा कारज करत चला आवत अहईँ, उ बुरा करत रहईँ जे गन्दा करत अहईँ, उ गन्दा करत रहईँ। जे धर्मी अहईँ उ धरम क कारज ही करत रहईँ।

12“देखा! मईँ जल्दी आवइवाला अहउँ! सबहिं मनइयन क ओनके कर्मन क अनुसार देइ क प्रतिफल मोरे पास अहइ। 13उ मईँ अलफा अहउँ अउर मईँ ओमेगा अहउँ। मईँ पहिला अहउँ अउर मईँ आखिरी अहउँ। मईँ आदि अहउँ अउर मईँ अन्त अहउँ।

14“उ पचे धन्य अहईँ जउन अपने कपड़न क धोइ लेत हीं। ओनका जीवन-पेड़ क खाइ क अधिकार होई। ओन

दरवाजन स होइके नगर मँ घुसइ क अधिकारी होईहीं। 15मुला ‘कुत्ता,’ जादू-टोना करइवाले, व्यभिचारी, मूतर क पूजइवाले, या झूठ स पिरेम अउर ओनपइ अचरज करत अहईँ बाहेर रहिहीं।

16“खुदइ मईँ ईसू, तोहरे पचे क बरे, अउर कसीलियन क बरे इ बातन क साच्छी देइ क बरे आपन सरगदूतन भेजेउँ। मईँ दाऊद क परिवार क बंसज अहउँ। मईँ भोर क दमकत तारा अहउँ।”

17आतिमा अउर दुलहिन करत ह, “आवा!” अउर जउन व्यक्ति एका सुनत ह, उहउ कहइ, “आवा!” अउर जउन व्यक्ति पिआसा होइ उहइ आवइ अउर जे चाहे उहइ इ जीवन देइवाली जल क उपहार क बिना मुल्य क ग्रहण करइ।

18मईँ सपथ खाईके ओन मनइयन क बरे चेताउनी देइत अहईँ जउन इ किताब मँ लिखा भविस्सबाणी क वचनन क सुनत हीं: एहमाँ स जब कउनो अउर कछू जोड़ देइ तउ इ किताब मँ लिखा महाविनास परमेस्सर ओकरे ऊपर ड़ाई।

19अउर जब नबियन क लिखी इ किताब मँ स कउनो सब्दन मँ स घटाई तउ परमेस्सर इ किताब मँ लिखा जीवन पेड़ अउर पवितर नगरी मँ स ओकर भाग ओसे छीन लीन्ह जाई।

20ईसू जउन बातन क साच्छी अहइ, उ कहत ह, “हाँ! मईँ जल्दी आवत अहउँ।”

आमीन! पभूँ ईसू आवा।

21पभूँ ईसू क अनुग्रह सबके साथ रहइ।